

研手
經室
集
三





石开
手

經

室

集

三

阮
元
著



中
華
書
局



學經室一集卷八

論語論仁論

孔子爲百世師。孔子之言。著於論語爲多。論語言五常之事詳矣。惟論仁者凡五十有八章。仁字之見於論語者。凡百有五爲尤詳。若於聖門最詳切之事論之。尙不得其傳而失其旨。又何暇別取論語所無之字標而論之邪。今綜論論語論仁諸章。而分證其說於後。謹先爲之發其凡曰。元竊謂詮解仁字。不必煩稱漢引。但舉曾子制言篇人之相與也。譬如舟車然相濟達也。人非人不濟。馬非馬不走。水非水不流。及中庸篇仁者人也。鄭康成注。讀如相人偶之人。數語足以明之矣。春秋時。孔門所謂仁也者。以此一人與彼一人相人偶。而盡其敬禮忠恕等事之謂也。相人偶者。謂人之偶之也。凡仁必於身所行者驗之。而始見。亦必有二人而仁乃見。若一人閉戶齊居。瞑目靜坐。雖有德埋在心。終不得指爲聖門所謂之仁矣。蓋士庶人之仁。見於宗族鄉黨。天子諸侯卿大夫之仁。見於國家臣民。同一相人偶之道。是必人與人相偶而仁乃見也。鄭君相人偶之注。卽曾子人非人不濟。中庸仁者人也。論語己立立人己達達人之旨。能近取譬。卽馬走水流之意。曰近取者。卽子夏切問近思之說也。蓋孔門諸賢。已有未仁難竝之論。慮及後世言仁之務爲高遠矣。孔子答司馬牛曰。仁者其言也訥。夫言訥於仁何涉。不知浮薄之人。語易侵暴。侵暴

則不能與人相人偶。是不訥卽不仁矣。所以木訥近仁也。仲弓問仁。孔子答以見大賓承大祭諸語。似言敬恕之道。於仁無涉。不知天子諸侯不體羣臣。不卹民時。則爲政不仁。極之視臣草芥。使民糜爛。家國怨而畔之。亦不過不能與人相人偶而已。秦隋是也。其餘聖門論仁。以類推之。五十八章之旨。有相合而無相戾者。卽推之諸經之旨。亦莫不相合而無相戾者。自博愛謂仁立說以來。歧中歧矣。吾固曰。孔子之道。當於實者近者庸者論之。則春秋時學問之道。顯然大明於世。而不入於二氏之塗。吾但舉其是者。而非者自見。不必多其辭說也。

子貢曰。如有博施於民。而能濟衆。何如。可謂仁乎。子曰。何事於仁。必也聖乎。堯舜其猶病諸。夫仁者己欲立而立人。己欲達而達人。能近取譬。可謂仁之方也已。

子曰。若聖與仁。則吾豈敢。抑爲之不厭。誨人不倦。則可謂云爾已矣。公西華曰。正唯弟子不能學也。

元謂孔子論人以聖爲第一。仁卽次之。仁固甚難能矣。聖仁二字。孔子皆謙不敢當。子貢視仁過高。誤入聖域。故孔子分別聖字。將仁字降一等論之。曰。所謂仁者。己之身欲立則亦立人。己之身欲達則亦達人。所以必兩人相人偶而仁始見也。卽如己欲立孝道。亦必使人立孝道。所謂不匱錫類也。己欲達德行。亦必使人達德行。所謂愛人以德也。曾子所謂人非人不濟。正是立人達人之道也。亦卽近取譬之道也。此皆不視仁太高。誤入聖字也。爲之不厭。己立己達也。誨人不倦。立人達人也。立

者如三十而立之立。達者如在邦必達在家必達之達。

元又謂孟子仁人心也義人路也。此謂仁猶人之所以爲心義猶人之所以爲路非謂卽心卽仁也。若云此仁卽真是心斷不可云此義卽真是路也。總之聖賢之仁必偶於人而始可見。故孔子之仁必待老少始見安懷若心無所著便可言仁是老僧面壁多年但有一片慈悲心便可畢仁之事有是道乎。

許叔重說文解字仁親也从人二段若膺大令注曰見部曰親者密至也會意中庸曰仁者人也注人也讀如相人偶之人以人意相存問之言大射儀揖以耦注言以者耦之事成於此意相人耦也聘禮每曲揖注以人相人耦爲敬也公食大夫禮賓入三揖注相人耦詩匪風箋云人偶能烹魚者人偶能輔周道治民者元謂賈誼新書匈奴篇曰胡嬰兒得近侍側胡貴人更進得佐酒前上時人偶之以上諸義是古所謂人耦猶言爾我親愛之辭獨則無耦耦則相親故其字从人二孟子曰仁也者人也謂仁之意卽人之也元案論語問管仲曰人也詩匪風疏引鄭氏注曰人偶同位之辭此乃直以人也爲仁也意更顯矣又案仁字不見於虞夏商書及詩三頌易卦爻辭之內似周初有此言而尚無此字其見于毛詩者則始自詩國風洵美且仁再溯而上則小雅四月先祖匪人胡寧忍予此匪人人字實是仁字卽人偶之意與論語人也奪伯氏邑相同蓋周初但寫人字周官禮後始

造仁字也。鄭箋解匪人爲非人。孔疏疑其言之悖慢。皆不知人卽仁也。

陽貨謂孔子曰。懷其寶而迷其邦。可謂仁乎。曰。不可。好從事而亟失時。可謂知乎。曰。不可。日月逝矣。歲不我與。孔子曰。諾。吾將仕矣。

元謂魯國時人之論。已皆以聖仁尊孔子。故孔子曰。則吾豈敢。陽貨之言。亦因時論而難之也。又智者仁之次。漢書古今人表。敘論九等。列智人於仁人下。子張以仁推令尹子文及陳文子。孔子皆答以未智焉。得仁。明乎必先智而後能仁也。故陽貨諷孔子。仁智竝稱。孔子謙不敢當。非特不居仁。且不居智。孔子又言仁者安仁。智者利仁。此可驗聖仁智三者之次矣。

子夏曰。博學而篤志。切問而近思。仁在其中矣。

子游曰。吾友張也。爲難能也。然而未仁。

曾子曰。堂堂乎張也。難與並爲仁矣。

元謂以上三章。孔門論仁近譬之道。子夏恐學者視仁過高。將流爲虛悟遠求也。故曰勿謂仁不易知。但博學篤志切問近思。仁道卽可近譬而知。此數語將晉宋以後一切異端空虛元妙之學。

晉人
辛學

最重清遠。遠與
近譬近思相反。

儒家學案。標新競勝之派。皆預爲括定。曾子子游。慮子張於人無所不容過於高大。不能就切近之事與人爲仁。亦同此說也。其曰爲仁。可見仁必須爲。非端坐靜觀卽可曰仁也。曰竝爲。

竝卽相人偶之說也。

顏淵問仁子曰克己復禮爲仁。一曰克己復禮天下歸仁焉。爲仁由己而由人乎哉。顏淵曰請問其目。子曰非禮勿視非禮勿聽非禮勿言非禮勿動。顏淵曰回雖不敏請事斯語矣。仲弓問仁子曰出門如見大賓使民如承大祭己所不欲勿施於人在邦無怨在家無怨。仲弓曰雍雖不敏請事斯語矣。

樊遲問仁子曰愛人問知子曰知人。樊遲未達子曰舉直錯諸枉能使枉者直。樊遲退見子夏曰鄉也吾見於夫子而問知子曰舉直錯諸枉能使枉者直何謂也。子夏曰富哉言乎舜有天下選於衆舉皋陶不仁者遠矣湯有天下選於衆舉伊尹不仁者遠矣。

元謂右三章皆言王者以仁治天下之道。顏子克己已字卽自己之己與下爲仁由己相同言能克己復禮卽可竝人爲仁。一曰克己復禮而天下歸仁此卽己欲立而立人已欲達而達人之道。仁雖由人而成其實當自己始若但知有己不知有人卽不仁矣。孔子曰勿謂仁者人也必待人而後竝爲仁爲仁當由克己始且卽繼上二克己字疊而申之曰爲仁由己而由人乎哉亦可謂大聲疾呼明白曉暢矣。若以克己字解爲私欲則下文爲仁由己之己斷不能再解爲私而由己不由人反詰辭氣與上文不相屬矣。顏子請問其目孔子答以四勿卽克之謂也。視聽言動專就己身而言若

克己而非禮勿視勿聽勿言勿動斷無不愛人斷無與人不相人偶者人必與己竝爲仁矣。俚言之。若曰我先自己好。自然要人好。我要人好。人自與我同作好人也。一介之士處世。天子治天下。胥是道也。視聽言動不涉家國天下一字。而齊治平之道具在。孔子恐學者爲仁專待人而後並爲之。故收向內言。孟子曰仁內也。卽此說也。然收至視聽言動亦內之至矣。一部論語孔子絕未嘗於不視不聽不言不動處言仁也。顏子三月不違仁。而孔子向內指之曰其心不違。可見心與仁究不能使之渾而爲一曰卽仁卽心也。此何異懸之分也。又左傳昭公十二年楚靈王聞右尹子革諷祈招之詩而不能自克。以及於難。仲尼曰古也有志克己復禮仁也。楚靈王若能如是。豈其辱於乾谿。據此可見克己復禮本是古語。而孔子嘗引之。且觀楚靈王之事。可知克己復禮則家國必仁。不能克己復禮則國傾身亡。夫求諸天豈止不能克己。究其始亦不過因不能克己充之至於如此耳。

毛西河檢討四書改錯曰馬融以約身爲克己從來說如此。惟劉炫曰克者勝也。此本揚子雲勝己之私之謂克語。然己不是私。必從己字下添之私二字。原是不安。至程氏直以己爲私。稱曰己私。致集注謂身之私。欲別以己上添身字而專以己字屬私欲。於是宋後字書皆注己作私。引論語克己復禮爲證。則誣甚矣。毋論字義無此卽以本文言。現有爲仁由己己字在下。而一作身解一作私解。其可通乎。且克己不是勝己私也。克己復禮本是成語。春秋昭十二年楚靈王聞祈招之詩不能自

克以及於難。夫子聞之歎曰：古也有志，克己復禮仁也。楚靈王若能如是，豈其辱於乾谿？是夫子既引此語以歎楚靈，今又引以告顏子，雖此間無解，而在左傳則明有不能自克，作克己對解。克者，約也。抑也。己者，自也。何嘗有己身私欲重煩戰勝之說？故春秋莊八年書師還，杜預以爲善公克己復禮，而後漢元和五年平望侯劉毅上書云：克己引愆，顯揚側陋，謂能抑己以用人，卽北史稱馮元興躬身克己，人無恨者。唐韓愈與馮宿書，故至此呂來克己自下，直作卑身自下解。若後漢陳仲弓誨盜曰：觀君狀貌，不侶惡人，宜深剋己反善，別以克字作剋字，正以培剋損削皆深自貶抑之義，故云：則是約己自剋，不必戰勝，況可詰私字也。

凌次仲教授曰：卽以論語克己章而論，下文云爲仁由己，而由人乎哉？人已對稱，正是鄭氏相人偶之說。若如集注所云：豈可曰爲仁由私欲乎？再以論語全書而論，如不患人之不己知，見學而及靈問篇，又里仁作不

患莫己知，衛靈公作不病人之不己知。

夫仁者己欲立而立人，己欲達而達人，己所不欲勿施於人。

仲弓問仁子貢問一言章皆有此語。

古之學

者爲己，今之學者爲人。修己以安人，君子求諸己，小人求諸人，皆人已對稱。此外之己字，如無友不如己者，人潔己以進，仁以爲己任，行己有恥，莫己知也，恭己正南面以爲厲己，以爲謗己，若作私欲解，則舉不可通矣。馬注以克己爲約身，最得經意。邢叔明忽援劉光伯之言，謂嗜欲與禮義交戰，蓋

劉襲春秋正義所述者。不知劉氏因上文有楚靈王不能自克之語。故望文生義耳。與論語何涉。竊以馬注申之。克己已卽修身也。故修己以敬。修己以安人。修己以安百姓。直云修。不云克。中庸云。非禮不動。所以修身。動實兼視聽言三者。與下文答顏淵請問其目。正相合。辭意尤明顯也。臧用中太學曰。按左氏克己復禮仁也。卽論語克己復禮爲仁。古志本有是語。孔子嘗稱之。左氏引以論楚子。論語引以答顏淵。注疏家各望文生義。爾雅釋詁。克勝也。又勝克也。展轉相訓。杜元凱本之。楚靈王誇功伐。多嗜慾。不能修身自勝以歸於禮。故劉光伯疏有嗜慾與禮義交戰之說。此以釋左氏。而非以釋論語也。馬季長以克己爲約身者。能修己自勝。約儉其身。卽下文非禮勿動四者。是范武子訓克爲責。責己失禮而復之。與下文四勿義亦通。馬氏約身之訓。卽論語以約失之者鮮矣之約。約身則非禮勿視聽言動。故克己復禮連文。左傳論語馬杜范劉等說。義本互通。惟劉光伯嗜慾之言。意主楚靈王。而邢叔明襲之以釋論語。遂開集注訓己爲私欲之端。與全部論語人已對舉之文。方鑿員柄之不合矣。

元謂仲弓問仁。孔子告以如見大賓諸語。似敬恕之道。與仁無涉。不知古天子諸侯之不仁者。始於不敬大臣。不體羣臣。使民不以時。漸至離心離德。甚至視臣如草芥。糜爛其民而戰之。若秦隋之殺害羣臣。酷虐百姓。行不順。施不惠。家邦皆怨。是不仁之至也。究其始。不過由不敬不恕充之。以至於

此淺而言之。不愛人。不人偶人而已。若有見大賓承大祭之心。行恕而帥天下以仁者。豈肯少爲輕忽哉。此所以爲孔門之仁也。又子夏論舉臯陶伊尹而不仁者遠。此亦爲邦之道。不仁者遠。能使枉者直。此卽己立立人已達達人之道。亦卽天下歸仁之道也。

又案孔子惟與顏子仲弓論南面爲邦之道。此章大賓大祭。專指天子而言。周禮凡言大賓客。皆諸侯朝覲之禮。爾雅曰。禘。大祭也。可見非朝覲非禘祫不得稱大賓大祭。此與夏時殷輅之例同。

又案僖三十三年左傳。晉曰。季之言曰。臣聞之。出門如賓。承事如祭。仁之則也。孔子語本此。孔門師弟所述。半爲古人之恆言。故孝經中語。每見於左傳。世人以其出於孔子。則重之。出於子革胥臣。則忽之。豈知此皆夏商以來相傳之言。孔子且奉爲準繩。所以春秋時學行爲至中庸也。顏子仲弓所謂請事斯語。乃有事於孔子所舉之古語也。

子曰。仁遠乎哉。我欲仁。斯仁至矣。

元謂此章卽一日克己復禮。天下歸仁之說。

子張問仁於孔子。孔子曰。能行五者於天下。爲仁矣。請問之。曰。恭、寬、信、敏、惠。恭則不侮。寬則得衆。信則人任焉。敏則有功。惠則足以使人。

元謂兼五者之長。行之天下。始可謂仁。必如此始能愛及天下臣民也。又何疑於敬恕之非仁乎。大

約聖仁二字所包甚廣。

子曰。知及之。仁不能守之。雖得之。必失之。知及之。仁能守之。不莊以蒞之。則民不敬。知及之。仁能守之。莊以蒞之。動之不以禮。未善也。

元謂此章亦論治天下國家之道。動之不以禮。謂不動民以禮也。

子曰。如有王者。必世而後仁。

元謂此章論王者化民成俗。使天下不仁者盡改而爲仁。非三十年之久不可。所謂先難而後獲也。孟武伯問子路仁乎。子曰。不知也。又問。子曰。由也。千乘之國。可使治其賦也。不知其仁也。求也。何如。子曰。求也。千室之邑。百乘之家。可使爲之宰也。不知其仁也。亦也。何如。子曰。赤也。束帶立於朝。可使與賓客言也。不知其仁也。

子張問曰。令尹子文三仕爲令尹。無喜色。三已之。無愠色。舊令尹之政。必以告新令尹。何如。子曰。忠矣。曰。仁矣乎。曰。未知焉得仁。崔子弑齊君。陳文子有馬十乘。棄而違之。至於他邦。則曰。猶吾大夫崔子也。違之。一邦。則又曰。猶吾大夫崔子也。違之。何如。子曰。清矣。曰。仁矣乎。曰。未知焉得仁。

元謂仁之有益於人民者甚大。孔子尚不敢當。故但以治賦爲宰。與賓客言。忠。清。許人。而不許以仁。子貢視仁過高遠。故孔子近而易之。孟武伯子張視仁太易。故孔子難之。

憲問恥。子曰：邦有道，穀；邦無道，穀恥也。克伐怨欲不行焉，可以爲仁矣。子曰：可以爲難矣。仁則吾不知也。
臧庸案：皇侃義疏：邢昺正義皆一章。集注本自克伐怨欲以下分別章談。

元謂此但能無損於人，不能有益於人，未能立人達人，所以孔子不許爲仁。

有子曰：其爲人也孝弟，而好犯上者，鮮矣；不好犯上，而好作亂者，未之有也。君子務本，本立而道生，孝弟也者，其爲仁之本與。

宰我問：三年之喪，期已久矣。君子三年不爲禮，禮必壞；三年不爲樂，樂必崩。舊穀既沒，新穀既升，鑽燧改火，期已可矣。子曰：食夫稻，衣夫錦，於女安乎？曰：安。女安則爲之。夫君子之居喪，食旨不甘，聞樂不樂，居處不安，故不爲也。今女安，則爲之。宰我出。子曰：予之不仁也。子生三年，然後免於父母之懷。夫三年之喪，天下之通喪也，予也有三年之愛於其父母乎？

子曰：君子篤於親，則民興於仁；故舊不遺，則民不偷。

元謂右三章，可見親親而仁，民仁而愛物之序。孝弟爲仁之本，卽孟子所謂未有仁而遺其親者也。所以堯舜必由親九族而推至民雍也。博愛平等之說，不必辯而知其誤矣。爲仁爲孝弟之本，故孔子謂宰我欲短喪爲不仁也。

微子去之，箕子爲之奴，比干諫而死。孔子曰：殷有三仁焉。

元謂三人行不同而孔子皆以仁許之。愛人之道也。愛人尙謂之仁。况愛君至於如是乎。

冉有曰。夫子爲衛君乎。子貢曰。諾。吾將問之。入曰。伯夷叔齊何人也。曰。古之賢人也。曰。怨乎。曰。求仁而得仁。又何怨。出曰。夫子不爲也。

元謂夷齊讓國。相偶而爲仁。正是己立立人已達達人之道。諫而餓死。與比干同。愛君之至也。衛君反是不仁可知。

子曰。志士仁人。無求生以害仁。有殺身以成仁。

曾子曰。士不可以不宏毅。任重而道遠。仁以爲己任。不亦重乎。死而後已。不亦遠乎。

子曰。富與貴。是人之所以欲也。不以其道得之。不處也。貧與賤。是人之所以惡也。不以其道得之。不去也。君子去仁。惡乎成名。君子無終食之間違仁。造次必於是。顚沛必於是。

子張問於孔子曰。何如斯可以從政矣。子曰。君子惠而不費。勞而不怨。欲而不貪。泰而不驕。威而不猛。子張曰。何謂惠而不費。子曰。因民之所利而利之。斯不亦惠而不費乎。擇可勞而勞之。又誰怨。欲仁而得仁。又焉貪。君子無衆寡。無小大。無敢慢。斯不亦泰而不驕乎。君子正其衣冠。尊其瞻視。儼然人望而畏之。斯不亦威而不猛乎。

元謂以上四章。以比干夷齊證之。其說更明。聖門論仁。爲富貴生死所不能奪。所以聖人之言。反正

經權行之百世而無弊。

子貢曰。管仲非仁者與。桓公殺公子糾。不能死。又相之。子曰。管仲相桓公。霸諸侯。一匡天下。民到於今受其賜。微管仲。吾其被髮左衽矣。豈若匹夫匹婦之爲諒也。自經於溝瀆而莫之知也。

子路曰。桓公殺公子糾。召忽死之。管仲不死。曰。未仁乎。子曰。桓公九合諸侯。不以兵車。管仲之力也。如其仁。如其仁。

元謂此二章論管仲不必以死子糾爲仁。而以匡天下爲仁。蓋管仲不以兵車會諸侯。使天下之民無兵革之災。保全生民性命極多。仁道以愛人爲主。若能保全千萬生民。其仁大矣。故孔子極許管仲之仁。而略其不死公子糾之小節也。

司馬牛問仁。子曰。仁者其言也訥。曰。其言也訥。斯謂之仁矣乎。子曰。爲之難。言之得無訥乎。或曰。雍也。仁而不佞。子曰。焉用佞。禦人以口給。屢憎於人。不知其仁。焉用佞。

元謂未有佞人禦人以口給。而能愛人與人相人偶者。所以仁道貴訥。訥也。

子曰。剛毅木訥近仁。

子曰。知者不惑。仁者不憂。勇者不懼。

子曰。君子道者三。我無能焉。仁者不憂。知者不惑。勇者不懼。子貢曰。夫子自道也。

子曰。民之於仁也。甚於水火。水火吾見蹈而死者矣。未見蹈仁而死者也。

子曰。有德者必有言。有言者不必有德。仁者必有勇。勇者不必有仁。

樊遲問仁。子曰。居處恭。執事敬。與人忠。雖之夷狄。不可棄也。

元謂以上六章。由司馬牛問君子及憂無兄弟推之。可見爲仁須訥言。修行恭敬忠勇。自然四海之人。各以仁應。雖之絕域而不可棄。無兄弟亦無害也。亦卽顏子天下歸仁之道也。

子曰。當仁不讓於師。

子曰。苟志於仁矣。無惡也。

元謂以上二章。可見爲仁須剛勇也。

子張問士何如斯可謂之達矣。子曰。何哉。爾所謂達者。子張對曰。在邦必聞。在家必聞。子曰。是聞也。非達也。夫達也者。質直而好義。察言而觀色。慮以下人。在邦必達。在家必達。夫聞也者。色取仁而行違。居之不疑。在邦必聞。在家必聞。

子曰。巧言令色。鮮矣仁。

元謂上二章所言。乃剛毅木訥之反。

子曰。弟子入則孝。出則弟。謹而信。汎愛衆而親仁。行有餘力。則以學文。

子貢問爲仁。子曰：「工欲善其事，必先利其器。居是邦也，事其大夫之賢者，友其士之仁者。」
曾子曰：「君子以文會友，以友輔仁。」

樊遲問：「知，子曰：『務民之義，敬鬼神而遠之，可謂知矣。』問：『仁，曰：『仁者先難而後獲，可謂仁矣。』周有大賚，善人是富，雖有周親，不如仁人。」
子曰：「里仁爲美，擇不處仁，焉得知？」

元謂以上六章，皆言爲仁須擇仁人與我相助，觀此則相人偶之說益明矣。

子曰：「人而不仁，如禮何？人而不仁，如樂何？」

子曰：「君子而不仁者有矣夫，未有小人而仁者也。」

子曰：「我未見好仁者，惡不仁者；好仁者，無以尚之；惡不仁者，其爲仁矣，不使不仁者加乎其身，有能一日用其力於仁矣乎？我未見力不足者，蓋有之矣，我未之見也。」

子曰：「好勇疾貧，亂也；人而不仁，疾之已甚，亂也。」

子曰：「惟仁者能好人，能惡人。」

元謂以上五章，言不仁之人當惡之，若不能分別之，必自己爲仁之道有未至也。不仁雖當疾惡之，然已甚則足以召亂，故曰：「惟仁者能惡人，不使不仁者加身，此剛毅之至，不與不仁者相偶也。」一日

用力無不足。卽一日克己復禮之說。又禮樂亦惟仁者始能行之。如春秋之世。列國尙行禮樂。覲饗朝會皆禮樂也。若觀兵滅國。仇殺相尋。何必揖讓於陔肆間哉。

子曰。好仁不好學。其蔽也愚。

宰我問曰。仁者雖告之曰。井有仁焉。其從之也。子曰。何爲其然也。君子可逝也。不可陷也。可欺也。不可罔也。

子曰。人之過也。各於其黨。觀過。斯知仁矣。

元謂右三章。可見爲仁之道。若不明其過。必失之愚。有此不可陷及惡不仁兩事。始見孔子論仁之全道。不應更有一豪流弊。其有弊者。因不能證明聖言而失其本旨也。

子曰。回也。其心三月不違仁。其餘。則日月至焉而已矣。

子曰。不仁者。不可以久處約。不可以長處樂。仁者安仁。知者利仁。

子曰。志於道。據於德。依於仁。游於藝。

子曰。知者樂水。仁者樂山。知者動。仁者靜。知者樂。仁者壽。

元謂以上四章。言爲仁之道。在於悠久。顏子但許三月不違。可見爲仁之難。心與仁不違。可見仁與人心。究不能渾而爲一。若直號仁爲本心之德。則是渾成之物。無庸用力爲之矣。

子罕言利與命與仁。

元謂孔子言仁者詳矣。曷爲曰罕言也。所謂罕言者。孔子每謙不敢自居於仁。亦不輕以仁許人也。又案。元此論乃由漢鄭氏相人偶之說序入。學者或致新僻之疑。不知仁字之訓爲人也。乃周秦以來相傳未失之故訓。東漢之末。猶人人皆知。並無異說。康成氏所舉相人偶之言。亦是秦漢以來民間恆言。人人在口。是以舉以爲訓。初不料晉以後此語失傳也。大約晉以後異說紛歧。狂禪迷惑。實非漢人所能預料。使其預料及此。鄭氏等必詳爲之說。不僅以相人偶一言以爲能近取譬而已。

學經室一集卷九

孟子論仁論

孟子之學純於孔子堯舜之道。漢唐宋以來。儒者無間言也。今七篇之文。具在。試總而論之。孟子於孔子堯舜之道。至極推尊。反覆論說者。仁也。元於論語之仁。已著論矣。由是再論孟子之論仁。孟子論仁無二道。君治天下之仁。士充本心之仁。無異也。治天下非仁不可。故述孔子之言曰。道二。仁與不仁而已矣。又曰。君不行仁政而富之。皆棄於孔子者也。又曰。齊人無以仁義與王言者。我非堯舜之道不敢以陳於王前。蓋孟子時各國皆爭戰不愛民。專欲以利得天下。孟子反之。一則曰。仁者無敵。再則曰。國君好仁。天下無敵。反覆於愛民行仁政不尚利。以勉齊梁之君。且曰。三代之得天下也以仁。其失天下也以不仁。此後韓非李斯之徒。專欲以不仁利其國。而秦之亡不旋踵矣。孟子論仁。至顯明。至誠實。未嘗有一豪流弊貽誤後人也。一介之士。仁具於心。然具心者。仁之端也。必擴而充之。著於行事。始可稱仁。孟子雖以惻隱爲仁。然所謂惻隱之心。乃仁之端。非謂仁之實事也。孟子又曰。仁之實。事親是也。是充此心始足以事親保四海也。若齊王但以羊易牛而不推恩。孝子但額有泚而不掩父母。乍見孺子將入井而不拯救。是皆失其仁之本心。不能充仁之實事。不得謂之爲仁也。孟子論良能良知。良知卽心端也。良能實事也。舍事實

而專言心。非孟子本指也。孟子論仁。至顯明。至誠實。亦未嘗舉心性而空之。迷惑後人也。然而君治天下之仁。有韓非之徒亂之。士充本心之仁。有釋氏之徒亂之。韓非之說其謬顯。釋氏之說其迷深。尋其源。皆出於老子之說。韓非託之。而遽至於大壞。釋氏襲之。而昧其所從來。是不可以不論。爰綜孟子各章。以類相從。以次相序。仿臺卿章指之意。各加按語。可見孟子之仁。與孔子堯舜之仁。無少差異。分之則習而不察。合之則章指並明。聖賢大道。朗然若日月之明。浩然若江河之行。判別若水火。而堅實如金石。刻薄寡恩之士。靈明太過之人。皆棄於孟子者也。

孟子曰。規矩方員之至也。至在夏后之世。此之謂也。

按此章專論仁爲堯舜之道。君臣當法堯舜。孔子曰。仁與不仁而已矣。可見治民者必以仁。暴民者必致亡。爲七篇之綱領。下二章亦同此指。此孟子傳孔子堯舜之道之據也。

孟子見梁惠王。至何必曰利。

按此章仁義。卽所謂堯舜之道。陳於王前。卽所謂格君心之非。

宋牼將之楚。至然而不王者。未之有也。何必曰利。

按此章言懷仁義必王。懷利必亡。利與仁義相反。君臣父子兄弟。非仁不行。與前章指同。又按利爲周易四德之一。故曰義之和。然周易之利。專言利物。梁惠王時之言利者。則專言利己。故矢口曰利。

吾國而孟子所關之利皆利己之利也。

孟子將朝王。至以慢其二哉。

孟子曰。欲貴者人之同心也。至所以不願人之文繡也。

孟子曰。有天爵者。有人爵者。至終亦必亡而已矣。

按以上三章言仁義爲堯舜之道。非此不陳於王前。在國君當專以此行政。士人亦以仁義爲天爵。不可貶道而要人爵。

孟子曰。人不足與適也。至一正君而國定矣。

按此章言君仁莫不仁。與非堯舜之道不陳相發明。

孟子曰。不仁而得國者有之矣。不仁而得天下未之有也。

孟子曰。以力假仁者霸。至無思不服。此之謂也。

按以上二章決言不仁不得天下。而秦旋以不仁得之。然孟子曰。以力服人者非心服也。又曰。得其民者得其心也。不得心不可云得民。不得民不可云得天下。是以二世卽亡也。故孟子曰。雖與之天下不能一朝居也。

孟子曰。三代之得天下也。以仁。其失天下也。以不仁。至是猶惡醉而強酒。

按此章言仁得天下不仁失天下自天子及士庶人皆以仁保之與孔子孝經相發明

孟子曰仁則榮不仁則辱至自作孽不可活此之謂也

公孫丑問曰夫子當路於齊至惟此時爲然

孟子曰仁言不如至得民心

滕文公問爲國孟子曰民事不可緩也至若夫潤澤之則在君與子矣

孟子曰易其田疇薄其稅斂至不仁者乎

孟子曰離婁之明至吾君不能謂之賊

按以上六章言爲政者必以仁仁者三代先王之道正經界薄稅斂不罔民久行而待時民之受虐政者必歸之莫之能禦是以大國畏之與急功近利之術全相反蓋大指全在仁也

孟子曰盡信書則不如無書至而何其血之流杵也

孟子曰仁之勝不仁也猶水勝火至亦終必亡而已矣

齊宣王問曰湯放桀武王伐紂至未聞弑君也

梁惠王曰晉國天下莫強焉至故曰仁者無敵王請勿疑

孟子曰有人曰我善爲陳我善爲戰大罪也至各欲正己也焉用戰

按以上五章皆言以仁伐不仁必無敵不可以善戰爲無敵。

齊宣王問曰交鄰國有道乎至民惟恐王之不好勇也。

滕文公問曰滕小國也竭力以事大國至君請擇於斯二者。

孟子曰天下有道小德役大德至逝不以濯。

按以上三章皆言以小國事大國乃保國愛民之道不可窮兵求勝以害民皆仁道也。

孟子曰不仁哉梁惠王也至及其所愛也。

孟子曰今之事君者曰我能爲君辟土地至不能一朝居也。

孟子曰求也爲季氏宰至辟草萊任土地者次之。

孟子曰桀紂之失天下也失其民也至載胥及溺此之謂也。

鄒與魯閔至君行仁政斯民親其上死其長矣。

孟子曰不仁者可與言哉至自作孽不可活。

按以上六章皆言不仁之君重賦斂好戰陳廢爛其民凶年不救民不得民心必致菑危憂辱陷於

死亡六國亡秦皆不逃乎此言可見堯舜孔子三代之仁政百世以俟聖人而不惑。

又按司馬遷以老子韓非同傳誠有見其清靜流爲法術也老子曰失道而後德失德而後仁失仁

而後義失。義而後禮。夫禮者忠信之薄而亂之首也。韓非子解老篇解之曰。失道而後失德。失德而後失仁。失仁而後失義。失義而後失禮。禮爲情貌者也。禮繁者實心衰也。今爲禮者能無爭乎。有爭則亂。故曰夫禮者忠信之薄也。而亂之首乎。按此乃老韓之原委也。故韓非曰。今世皆曰尊主安國者。必以仁義智能。而不知卑主危國者。必以仁義智能也。故有道之主。遠仁義。去智能。服之以法。是以譽廣而國威。民治而國安。凡術也者。主之所以執也。法也者。官之所以師也。又曰。仁暴者皆亡國者也。又引成驩曰。齊王太仁。太不忍人。則政亂於內。兵弱於外。此亡國之本也。按老子謂清靜而天下自正。究之天下必不能自正於清靜。故韓非等欲以法術治之。韓非謂仁暴皆亡國。而不知法術之卽暴也。孔孟之後。惟韓非全反仁義之說。秦李斯殺韓非而用其說。不旋踵而秦以暴亡矣。然老子之流爲五蠹。人知之。老子之流爲蓮社。則人不知也。

孟子曰。仁也者人也。合而言之道也。

孟子曰。人皆有不忍人之心。至苟不充之。不足以事父母。

齊宣王問曰。齊桓晉文之事可得聞乎。至然而不王者。未之有也。

按以上三章大指相同。仁之篆體。从人二。訓爲相人偶。論語中已備論之矣。孟子曰。仁也者。人也。此孟子學於子思得中庸之傳也。中庸曰。仁者人也。鄭康成氏以相人偶注之。孟子此章人也。人字亦

常讀如相人偶之人。合而言之。謂合人與仁言之。卽聖人之大道也。孟子曰。人皆有不忍人之心。以此一人不忍彼一人。卽二人相人偶之實據也。今人見孺子尙不忍。王見牛尙不忍。況相並之二人哉。前章謂惻隱之心。仁之端。而自謂不能充。謂其君不能充。此兩能字。卽後章折枝是不爲。非不能之能。後章推愛牛之恩。卽前章充見孺子之心。苟能充之。推之足以保四海。苟不能充之。推之不足以事父母。保妻子。相合而觀之。更深切著明矣。後儒謂孟子並重仁義。不知孟子大指以仁爲重。義禮智但因四端而並言之。卽如此章言四端。皆因不忍人之心而發也。

公都子曰。告子曰。性無善無不善也。至故好是懿德。

按此章言性善。惟爲性善。所以仁爲人心也。仁之端於乍見孺子將入井時覘之。皆有怵惕惻隱之心。盡人所同而物所無也。此孟子所舉性善最確實之據。象紂幽厲縱習爲惡。但於乍見之時未必無此心。是以孟子決其爲善者。全以乍字爲憑。仁非外鑠。求之則得。況蒸民之詩。足爲先聖相傳仁道之實證哉。

孟子曰。五穀者。種之美者也。至亦在乎熟之而已矣。

按此章言仁具於人心性。猶五穀之種。穀種須種之方熟。仁須爲之方成。乍見卽穀初生也。穀乃美種。可比人之性善。美稗則牛羊之比矣。

孟子曰。人之所不學而能者。其良能也。至達之天下也。

按良能良知良字。與趙孟之所貴非良貴也。良字同良實也。

見漢書注

無奧旨也。此良知二字。不過孟子

偶然及之。與良貴相同。殊非七篇中最關緊要之言。且卽爲要言。亦應良能二字重於良知。方是充仁推恩之道。不解王文成何所取。而以爲聖賢傳心之祕也。陽明謂學不資於外求。但當反觀內省。聖人致知之功。至誠無息。其良知之體。皦如明鏡。妍媸之來。隨物見形。而明鏡曾無留染。所謂情順萬事而無情也。無所住以生其心。佛氏曾有是言。未爲非也。明鏡之應。一照皆真。是生其心處。妍者妍。媸者媸。一過而不留。卽無所住處。陽明之言如此。學者試舉以求之。孟子七篇中有此境否。此境可以論孩提愛親之仁否。陽明直以爲佛氏之言。而不之諱。且此儒佛相附。亦不始於陽明。本可不可深辯。但此命意造語之超妙。尙非全是佛氏之言。此乃晉宋間談老莊者。無可再談之時。亦雷次宗一流人。講禮厭繁之後。懸遠次宗精謹喪服諸禮乃走老聃厭棄周禮。據曾子問。博習周禮者莫如老子。據道德經。厭棄周禮者莫如老子。而歸於元妙之故轍。復擇取清言中自然神理。最清遠超妙者。與白蓮社諸人。合西僧之說。相近相似者。傳會之。委縱之。譯爲釋言。而昧所從來。由此傳流南北。遂成風尚。再成禪學。其風愈狂。蓋老莊之書。具在。止於此而已。不能以其本無者託之。至於釋氏梵書。則非譯不明。慧業文人。縱筆所之。無所不可。無從驗證。

故晉會稽王道士傳曰。佛者清遠無虛之神。夫清遠無虛。非老莊清言而何。陽明宗旨。直是禪學。尙非釋學也。

又按佛經大指。具見漢四十二章道教等經。不過如此。無大玄妙。自晉常山衛道安以彌天俊辯之高才。獨坐靜室十二年。構精神悟。始謂舊經爲舛。道安乃第一次靜坐。達磨爲第二次靜坐。此以晉人玄學入釋學之始。蓋舊

經本非舛。然必以爲舛。方能以玄學入變易之也。故蓮社魏道生曰。自經典東流。譯人重阻。多滯權文解通圓義。若忘筌得魚。始可言道矣。舊學僧徒。以爲背經。據此可見晉宋人以老莊玄學改增佛說之實據。舊學僧徒。拙守本經者。見其相背矣。道安旣與佛圖澄合。互相標榜。符會如一。復令玄宗流布。分遣弟子四出。道安與慧遠入襄陽。慧遠又入廬山。與雷次宗周續之。宗炳等合。雷次宗。周續之。宗炳。與賈慧遠。本皆通儒才士。慧遠少隨舅令狐氏遊學許洛。博綜六經。尤善莊老。從釋道安受業。周續之少從范甯通經。窮研老易。預蓮社。宗炳富於學識。尤精玄理。入蓮社。雷次宗博學明詩禮。入蓮社。以上見宋書北魏書及蓮社高賢傳。此傳宋以前名蓮社十八賢行狀。周續之。雷次宗。又同受詩義於慧遠法師。見陸德明毛詩音義。謝靈運。亦

慧業文人。故晉宋以後。西僧如佛圖澄。鳩摩羅什等。多以神驗見異於世。至於翻經著論。非藉名儒文人之筆。不能踵事變本。引人喜入彼道如此。此以玄學入釋學而昧所從來之蹤跡也。至于梁達

磨直指本心。不立文字。大興禪宗。則是西域人來中土。不耐經卷。不如全掃一切。更爲直捷。此又遠不及慧遠翻經之時。在彼教中又下一等矣。達磨入中土。言語難通。亦慧能等傳會而成也。故山儒而玄。由玄而釋。其樞紐總在道安慧遠之間。由釋而禪。其樞紐又在達磨慧能之間。後儒不溯而察之。所以象山陽明白沙。受蓮社少林之紿而不悟矣。

孟子曰。仁人心也。至求其放心而已矣。

孟子曰。自暴者不可與有言也。至哀哉。

孟子曰。人皆有所不忍。至勝用也。

王子塾問曰。士何事。至備矣。

按。以上四章。皆本孔子之言。爲居仁由義之訓。不忍人。不害人。不殺一無罪。仁之至也。

萬章曰。牛山之木嘗美矣。至惟心之謂與。

按。此章。卽上章求放心之道。大指謂仁義爲本心。故曰仁人心也。若失其本心。害人。無恥。無禮。則不成爲人。與禽獸無異。與仁人也之說不合矣。所以言及於操心與存夜氣者。仍是責之以仁。非令其於空寂處觀本來面目。如釋氏之明心見性也。下章言賢者勿喪心。在甚於生死之事。失其本心。在身死不受之事。皆非事物未來處也。凡此皆以仁義禮智求於心。不使放失。故雖仁義禮智以

明心於寂然不動之初。孟子七篇中無此說也。

孟子曰：君子之於物也，至仁民而愛物。

孟子曰：知者無不知也，至是之謂不知務。

孟子曰：人之所以異於禽獸者幾希，至由仁義行，非行仁義也。

按孟子言仁，上承堯舜，其淵源在此三章。虞書曰：克明峻德，以親九族。九族既睦，平章百姓。百姓昭明，協和萬邦。黎民於變時雍。此卽全是仁道。孟子所言親親、仁民、愛物、急先務、明庶物、察人倫，是皆推己及物，由近及遠。聖賢言仁，既非楊氏之爲我，亦非墨氏之兼愛，亦非釋氏之慈悲。

又按夏商以前無仁字。

虞書德字惠字，卽包仁字在內。

虞書克明峻德，卽與孟子仁字無異。故仁字不見於尚書。虞夏

商書

仲虺之誥，克寬克仁，太甲懷於有仁，皆古文尚書。

詩雅頌易卦爻辭之中，此字明是周人始因相人偶之恆言而造爲仁字。

孔子易文言曰：君子體仁足以長人。論語曰：雖有周親不如仁人。著於經矣。然非始於孔子也。元者善之長也。一節春秋左傳以爲穆姜之言。論語周親仁人亦書之逸文。今在古文秦誓。惟周禮大司徒六德

知仁聖義中和爲仁字初見最古者。然則仁字之行，其在成康以後乎？而其原則分於虞書之德字。

惠字也。

孟子曰。仁之實事親是也。至手之舞之。

按此章言仁事親而加以實字。實者對端字爲言。蓋惻隱爲仁之端。充此端以行仁則孝。孝弟爲仁之本。君子務本爲急。自天子至庶人莫不以事親爲首務。舜之事親。孔子言孝爲仁本。皆是道也。實者實事也。聖賢講學不在空言。實而已矣。故孔子曰。吾道一以貫之。貫者行之於實事。非通悟也。通悟則良知之說。緣之而起矣。故此實字最顯最重。而歷代儒者忽之。惟漢趙岐見之最顯。故於孟子言無實不祥。特注之曰。孝子之實。養親是也。

孟子曰。口之於味也。至有性焉。君子不謂命也。

按此章趙岐注最爲詳明。實實漢以前直至三代。所謂性命者。不過如此。若謂性命之道。過于精微。是舍實實而蹈虛玄也。論語夫子言性與天道。不可得而聞。卽孟子所謂聖人之於天道也。此言王者受命等事。故不可得聞。

趙注曰。口之甘美味。日之好美色。耳之樂音聲。鼻之喜芬香。臭。易曰。其臭如蘭。四體謂之四肢。四肢解倦則思安佚不勞苦。此皆人性之所欲也。得居此樂者。有命。緣人不能如其願也。凡人則隨欲欲而求可樂。君子之道。則以仁義爲先。禮節爲制。不以性欲而苟求之也。故君子不謂性也。仁者得以恩愛施於父子。義者得以義理施於君臣。好禮者得以禮敬施於賓主。知者得以明智知賢達善惡人。導以天下。此皆命緣遭遇。乃得居而行之。不遇者不得施行。然亦才性有之。故可用也。凡人則歸之命緣。任天而已。不復治性以君子之道。則修仁行義。終難學知。庶幾聖人。稟賦不佞。不但坐而聽命。故曰君子不謂命也。

爲天命更明白矣。如舍此以別求精微。則入於老釋之趣矣。

又孟子直謂形色爲天性。厭

又按仁於父子爲命者。如韓輿使舜完廩浚井。此舜之命也。然而舜不謂之命。以自諉。必盡心知性。以盡事親之道。必至底豫而後已。所以謂之有性也。言性命者。守定孟子此章。及蒸民之詩。左傳劉康公之說。則實實可據。不必索奧妙於不可詰之鄉也。

告子曰。性猶杞柳也。至率天下之人。而禍仁義者。必子之言夫。

按此章。告子專以義爲外。而於仁帶說。孟子闢之之後。知仁爲內矣。猶執義外之說。

告子曰。食色性也。仁內也。非外也。至然則耆炙亦有外與。

按孟子各章。離之不察。互校便明。今以此章次於上二章之後。可見矣。仁之實爲事親。仁必內矣。義之實爲從兄。義亦必內也。味色聲臭安佚五者。孟子明明斷之曰。性也。旣曰性。則明是內也。安得以爲外。君子不謂性也。不過勉人安命。非眞謂性。此章告子首曰。食色性也。此四字原不錯。其錯在義外也。非內也。六字。故孟

子但力闢義之非外。使與仁之實爲事親。義之實爲從兄。較若畫一。告子食色性也之說。亦與孟子味色聲臭安佚性也之說。較若畫一。未之闕也。孟子以味色聲臭安佚爲性者。乃聖賢之常道。人世之恆情。聖賢之甘淡泊者。乃是知命。後儒皆以告子食色爲性之說爲非而攻之。其如與孟子前章相刺謬何。若必以告子之言無一是。則仁內也。非外也。六字亦非耶。況此章章末孟子詰之曰。然則耆炙亦有外與。是明明以口之於味爲內。卽執告子食色性也四字之矛。以刺義外也。非內也。六字

之盾。曷嘗謂甘食悅色爲非性哉。趙岐注本未錯也。又孟子曰。形色天性也。形與色尙直謂之性。何況味。色聲臭安佚也。孟子曰。如使口之於味也。其性與人殊。若犬馬之與我不同類也。則天下何者。易牙之於味也。此一節更爲明顯。與告子食色性也四字無異也。

孟子曰。廣土衆民。至四體不言而喻。

按。此章可見仁之根於心。孟子卽以爲性。卽所謂有性焉。不謂命也。

孟子曰。愛人不親。反其仁。至自求多福。

孟子曰。矢人豈不仁於函人哉。至反求諸己而已矣。

孟子曰。君子所以異於人者。至不患矣。

孟子曰。萬物皆備。至近焉。

按。上四章言仁爲人之心術。加一禮字。爲反求諸己不怨人之說。實論語克己復禮爲仁之正傳也。墨者夷之。至夷子憮然爲問曰。命之矣。

孟子曰。予豈好辯哉。至能言距楊墨者聖人之徒也。

有爲神農之言者許行。至惡能治國家。

按。以上三章。皆孟子闢異端之說。充塞仁道也。卽農家者流如許行者。尙必置辯。此時韓非之莊之

說尙未興。釋氏之言更未起。若孟子親見其說之害仁。其闢之更當何如。

公孫丑問曰。夫子加齊之卿相。至未有盛於孔子也。

按此章所言殺一不辜。卽不仁也。

又按古人論上等人。又分三等。曰聖人。仁人。智人。論語曰。何事於仁。必也聖乎。又曰。未智。焉得仁。又曰。若聖與仁。則吾豈敢。又陽貨曰。可謂仁乎。可謂智乎。合之孟子此章。仁且智。夫子既聖矣。則聖仁智三等。分明之至矣。又孟子曰。孔子之謂集大成。集大成也者。金聲而玉振之也。金聲也者。始條理也。玉振之也者。終條理也。始條理者。智之事也。終條理者。聖之事也。此章但言始智終聖。中間尙有仁之一等。孟子雖未言及。而實包舉在內。蓋有仁而未聖者矣。未有未仁而聖者也。此章定是始智中仁終聖也。孝經曰。夫孝始於事親。中於事君。終於立身。始終之間。原有中之一層。

淳于髡曰。先名實者爲人也。至衆人固不識也。

按此節論伯夷伊尹柳下惠皆爲仁。孟子又許伯夷伊尹爲聖。是古者皆以仁爲聖之次也。

公孫丑曰。高子曰。小弁。至五十而慕。

萬章問曰。象日以殺舜爲事。至可謂親愛之乎。

燕人畔。至又從而爲之辭。

按以上三章皆言善處仁道之變而不失爲仁道。

學經室一集卷十

性命古訓

性命之訓起於後世者且勿說之先說其古者古性命之訓雖多而大指相同試先舉尙書召誥孟子盡心二說以建首可以明其餘矣召誥曰節性惟日其邁王敬作所不可不敬德又曰若生子罔不在厥初生自貽哲命今天其命哲命吉凶命歷年又曰王其德之用祈天永命按召誥所謂命卽天命也若子初生卽祿命福極也哲與愚吉與凶歷年長短皆命也哲愚授於天爲命受於人爲性君子祈命而節性盡性而知命故孟子盡心亦謂口目耳鼻四肢爲性也性中有味色聲臭安佚之欲是以必當節之古人但言節性不言復性也王敬作所不可不敬德卽性之所以節也孟子曰口之於味也目之於色也耳之於聲也鼻之於臭也四肢之於安佚也性也有命焉君子不謂性也仁之於父子也義之於君臣也禮之於賓主也知之於賢者也聖人之於天道也命也有性焉君子不謂命也趙岐注曰口之甘美味目之好美色耳之樂音聲鼻之喜芬香四體謂之四肢四肢懈倦則思安佚不勞苦此皆人性之所欲也得居此樂者有命祿人不能皆如其願也凡人則任情從欲而求可樂君子之道則以仁義爲先禮節爲制不以性欲而苟求之也故君子不謂之性也仁者得以恩愛施於父子義者得以理義施於君臣好禮者得以禮

敬施於賓主。知者得以明智。知賢達善。聖人得以天道王於天下。此皆命祿遭遇。乃得居而行之。不遇者不得施行。然亦才性有之。故可用也。凡人則歸之命祿。任天而已。不復治性。以君子之道。則修仁行義。修禮學知。庶幾聖人。臺臺不倦。不但坐而聽命。故曰君子不謂命也。按孟子此章。性與命相互而爲文。性命之訓。最爲明顯。趙氏注。亦甚質實周密。豪無虛障。若與召誥相並而說之。則更明顯。惟其味色聲臭安佚爲性。所以性必須節。不節則性中之情欲縱矣。惟其仁義禮知聖爲命。所以命必須敬德。德卽仁義禮知聖也。且知與聖卽哲也。天道卽吉凶歷年也。今以此二經之說建首。而次以諸經。再隨諸經古訓。比而說之。可以見漢以前性命之說。未嘗少晦。詩曰。古訓是式。威儀是力。此之謂也。唐李習之復性之說。難於二氏。不可不辨也。

尙書皋陶謨。皋陶曰。慎厥身。修思永。惇敍九族。禹曰。知人則哲。能官人。安民則惠。黎民懷之。皋陶曰。亦行有九德。寬而栗。柔而立。愿而恭。亂而敬。擾而毅。直而溫。簡而廉。剛而塞。彊而義。彰厥有常。吉哉。日宣三德。夙夜浚明有家。日嚴祇敬六德。亮采有邦。無教逸欲有邦。兢兢業業。一日二日萬幾。天敍有典。勅我五典。五惇哉。天秩有禮。自我五禮有庸哉。同寅協恭。和衷哉。天命有德。五服五章哉。天討有罪。五刑五用哉。政事懋哉。懋哉。

按尙書此篇爲禹皋之訓。最古。凡商周經義。皆從此出。慎修身者。卽節性之訓所由來。思永者。卽祈

天永命之訓所由來。知人則哲者。卽今天其命哲之訓所由來。無教逸欲有邦。卽孟子不謂安佚爲性所由來。五典卽孟子仁義禮智之訓所由來。能官人能安民。卽孟子知之於賢者聖人於天道之訓所由來。天命有德。卽命哲命吉凶命歷年之訓所由來。日嚴敬德。卽王敬作所不可不敬德之訓所由來。堯舜禹皋陶文武周召孔孟。未嘗少有歧異虛高之說。出於其間。九德凡十八字。古訓多矣。本無靜寂覺照等字。雜於其間。

尙書西伯戡黎。祖伊曰。天既訖我殷命。故天棄我。不有康食。不虞天性。不迪率典。王曰。嗚呼。我生不有命在天。祖伊反曰。嗚呼。乃罪多參在上。乃能責命于天。

按以虞夏商周四代次之。性字始見於此。周易卦辭爻辭。但有命字。無性字。明是性字包括於命字之內也。此篇性字上加以天字。明是性受於天。孟子所謂有性焉。君子不謂命也。鄭康成注曰。王逆亂陰陽。不度天性。傲狠明德。不修教法。鄭氏以度訓虞。以修教法訓迪率典。是也。度性與節性同意。言節度之也。迪率典。卽中庸所說率性之謂道。修道之謂教。典卽虞書之五典也。紂自恃有天命。逸欲不修身敬德。以祈永命。所以祖伊言惟王自絕天命也。蓋罪多者。天以永命改爲不永。不能向天責命。此祈命之反也。性命二字相關。始見於此。質實明顯。曷嘗如李習之復性之說。自昌黎習之言性道者。幾欲自成一子。接跡孔孟。此則太過。故元但舉詩書各經古訓。尊而列之。比而讀之。略加按語。便可共見。擬於諸經之義疏。已爲僭矣。

又按周以前聖賢之言皆質實無高妙之旨。性之一字始見於此。次見於召誥。詩卷阿。宋王應麟以爲言性始於湯誥。此由不知降衷恆性乃古文尙書也。

尙書召誥周公曰。節性惟日其邁。王敬作所。不可不敬德。若生子罔不在厥初。生自貽哲命。今天其命哲。命吉凶。命歷年。王其德之用。祈天永命。

按尙書之虞性節性。毛詩之彌性。言性者所當首舉而尊式之。蓋最古之訓也。學者遠涉二氏而近忘聖經。何也。樂記曰。好惡無節。王制曰。節民性。皆式尙書節性之古訓也。哲愚吉凶永不永。皆命於天然。敬德修身。可祈永命。不率典者自棄其命。孟子所謂命也有性焉。是也。若諉之命而不可祈。豈周公金縢皆作僞哉。

尙書洪範箕子曰。九五福。一曰壽。二曰富。三曰康寧。四曰攸好德。五曰考終命。六極。一曰凶短折。二曰疾。三曰憂。四曰貧。五曰惡。六曰弱。

按福極皆通天下臣民言之。天下人之福極皆由君身所致。皆天性天命也。

詩大雅文王無念爾祖。聿修厥德。永言配命。自求多福。殷之未喪師。克配上帝。宜鑒于殷。駿命不易。

按此所謂命皆孟子聖人之於天道也。之天命修德。卽召誥不可不敬德之德。命雖自天而修德可求。故召誥曰。王其德之用。祈天永命。蓋文王之詩與召誥句句相同。皆反覆於殷周之天命也。

詩大雅卷阿。泂矣爾游矣。優游爾休矣。豈弟君子。俾爾彌爾性。似先公曾矣。爾土宇。亦孔之厚矣。豈弟君子。俾爾彌爾性。百神爾主矣。爾受命長矣。弗祿爾康矣。豈弟君子。俾爾彌爾性。純嘏爾常矣。毛傳云。彌終也。鄭箋云。終女之性命無困病之憂。

按詩三百篇。惟此詩三見性字。與命字相連爲文。且周易卦爻。全無性字。可見周初古人亦不必定於多說性字。此詩俾爾云云之文法。與天保定爾之俾爾單厚。何福不除。等句相同。雖言性而有命在內。故鄭箋兼性命言之。且但言無困病之憂。卽是考終福命。蓋彌性如洪範之五福。反之卽是六極。此周時人所說之性。非李習之所復之性。如果李習之所說者爲是。何以三百篇及今文尙書皆絕無其說也。

詩大雅抑。抑威儀。維德之隅。人亦有言。靡哲不愚。訏謨定命。遠猷辰告。敬慎威儀。維民之則。慎爾出話。敬爾威儀。無不柔嘉。淑慎爾止。不愆于儀。不僭不賊。鮮不爲則。

古文但說威儀。而威儀乃爲性命所關。乃包言行在內。言行卽德之所以修也。於此詩可見其概。德在內而威儀在外。故鄭氏箋云。賢者道行心平。可外占而知內。如宮室之制。內有繩直。則外有廉隅。訏謨定命。卽春秋左氏傳以定命也。之定命。所以當敬慎威儀也。出話有玷。不輯柔其顏。則愆于威儀矣。不淑慎其行止。卽愆于威儀矣。是以威儀如宮室之隅。包於外。德命在于內。言行亦卽在威儀。

之內行止之不愆在於不僭不賊而可以爲法也。古人說修身之道如此。尙書禹曰：慎乃在位，安汝止。卽淑慎爾止，在止於至善之止。

詩周頌：昊天有成命，二后受之，成王不敢康，夙夜基命宥密。毛傳云：宥寬密安也。

按此卽敬天命之義，寬安非祕密也。

春秋成公十三年左傳：成子受脤于社，不敬。劉子曰：吾聞之，民受天地之中以生，所謂命也。是以有動作

禮義威儀之則，以定命也。能者養之以福。

各本皆誤作養之以福。惟漢書律志五行志漢劉熊碑善作養之以福。顏氏漢書注云：之往也。往就福也。

不能者敗以取禍。是故

君子勤禮，小人盡力，勤禮莫如致敬，盡力莫如敦篤。敦在養神，篤在守業。國之大事，在祀與戎。祀有執鬯戎有受脤，神之大節也。今成子惰，弃其命矣，其不反乎。

按此中乃陰陽剛柔之中，卽性也。卽所謂命也。性字从心，卽血氣心知也。有血氣，無心知，非性也。有心知，無血氣，非性也。血氣心知，皆天所命，人所受也。人既有血氣心知之性，卽有九德五典五禮七情十義。故聖人作禮樂以節之，修道以教之。因其動作，以禮義爲威儀。威儀所以定命。定如詩天保定爾，亦孔之固之定。能者，勤於禮樂威儀，以就彌性之福祿。不能者，惰於禮樂威儀，以取弃命之禍亂。是以周以前聖經古訓，皆言勤威儀以保定性命。未聞如李習之之說，以寂明通照復性也。威儀者，人之體貌。後人所藐視爲在外最粗淺之事。然此二字，古人最重之。竊別撰威儀說以明之。

威儀說

晉唐人言性命者，欲推之於身心最先之天，商周人言性命者，祇範之於容貌最近之地，所謂威儀也。春秋左傳襄公三十一年，衛北宮文子見令尹圍之威儀，言於衛侯曰：「令尹似君矣，將有他志，雖獲其志，不能終也。」詩曰：「靡不有初，鮮克有終。」終之實難，令尹其將不免。公曰：「子何以知之？」對曰：「詩云：敬慎威儀，維民之則。令尹無威儀，民無則焉。」民所不則，以在民上，不可以終。公曰：「善哉！何謂威儀？」對曰：「有威而可畏，謂之威；有儀而可象，謂之儀。君有君之威儀，其臣畏而愛之，則而象之，故能有其國。家令開長世，臣有臣之威儀，其下畏而愛之，故能守其官職，保族宜家，順是以下，皆如是，是以上下能相固也。」衛詩曰：「威儀棣棣，不可選也。」言君臣上下父子兄弟內外大小，皆有威儀也。周詩曰：「朋友攸攝，攝以威儀。」言朋友之道，必相教訓以威儀也。周書敬文王之德曰：「大國畏其力，小國懷其德，言畏而愛之也。」詩云：「不識不知，順帝之則。」言則而象之也。紂囚文王七年，諸侯皆從之囚，紂於是乎懼而歸之，可謂愛之。文王伐崇，再駕而降爲臣，蠻夷帥服，可謂畏之。文王之功，天下誦而歌舞之，可謂則之。文王之行，至今爲法，可謂象之。有威儀也，故君子在位可畏，施舍可愛，進退可度，周旋可則，容止可觀，作事可法，德行可象，聲氣可樂，動作有文，言語有章，以臨其下，謂之有威儀也。又成公十三年曰：「成子受賑于社，不敬。」劉子曰：「吾聞之，民受天地之中以生，所謂命也，是以有動作禮義威儀之

則以定命也。能者養以之福，不能者收以取禍，是故君子勤禮，小人盡力，勤禮莫如致敬，盡力莫如敦篤。敬在養神，篤在守業。國之大事，在祀與戎。祀有執膳，戎有受賑，神之大節也。今成子惰，弃其命矣，其不反乎？觀此二節，其言最爲明顯矣。初未嘗求德行，言語性命於虛靜不易思索之境也。或左氏之言少有浮誇乎？試再稽之尙書，書言威儀者二。

顯命自亂于威儀，酒誥用燕喪威儀。

再稽之詩，詩三百篇中言威儀

者十有七。

汎彼柏舟一見，賓之初筵四見，既醉以酒兩見，鳧在涇一見，民亦勞止一見，上帝板板一見，抑抑威儀三見，天生蒸民一見，瞻仰昊天一見，時邁其邦一見，思樂泮水一見。

朋友相攝以威儀，已見

於左氏所引。此外敬慎威儀，惟民之則，威儀抑抑，德音秩秩，受福無疆，四方之綱，抑抑威儀，維德之隅，敬慎威儀，以近有德，則皆同乎北宮文子劉子之說也。威儀者，言行所自出，故曰慎爾出話，無不柔嘉，淑慎爾止，不愆于儀，此謂謹慎言行柔嘉容色之人，卽力威儀也。是以仲山甫之德，則柔嘉維則，令儀令色，小心翼翼，古訓是式，威儀是力，魯侯之德，則穆穆敬明，敬慎威儀，維民之則矣。成王之德，則有孝有德，四方爲則，永永卬卬，四方爲綱矣。且百行莫大於孝，孝不可以情貌言也。然詩曰：敬慎威儀，維民之則，靡不有孝，自求伊祐矣。又言威儀孔時，君子有孝子矣。且力於威儀者，可祈天命之福，故威儀抑抑爲四方之綱者，受福無疆也。威儀反反者，降福簡簡，福祿來反也。此能者養以之福也。反是則威儀不類者，人之云亡矣。威儀卒迷者，喪亂蔑資矣。且定命卽所以保性，卷阿之詩

言性者三而繼之曰。如圭如璋。令聞令望。四方爲綱。此亦卽假樂威儀爲四方綱之義也。凡此威儀。爲德之隅。性命所以各正也。匪特詩也。孔子實式威儀定命之古訓矣。故孝經曰。君子言思可道。行思可樂。德義可尊。作事可法。容止可觀。進退可度。以臨其民。是以其民畏而愛之。則而象之。故能成其德教。而行其政令。詩云。淑人君子。其儀不忒。論語曰。君子不重則不威。學則不固。此與詩左傳之大義。無家釐之差。孔子之言。似未嘗推德行言語性命於虛靜不易思索之地也。

春秋文公十三年左傳。邾子曰。天生民而樹之君。以利之也。命在養民。死之短長。時也。民苟利矣。遷也。吉莫如之。遂遷於繹。五月邾文公卒。君子曰。知命。

按。此言知天命在利民爲大。不以一己吉凶之命不利民。

春秋莊公元年穀梁傳。人之於天也。以道受命於人也。以言受命。不若於道者。天絕之也。不若於言者。人絕之也。臣子大受命。

按。以道者天道也。

周易文言曰。利貞者。情性也。

按。情發於性。故說文曰。性人之陽氣。性善者也。情人之陰氣。有欲者也。許氏之說。古訓也。味色聲臭喜怒哀樂。皆本於性。發於情者也。情括於性。非別有一事與性相分而爲對。故詩。蒸民。鄭箋曰。其性。

有物象其情有法則情法性陰承陽也。鄭氏解詩之物則蓋言性而兼括情也。鄭氏之說亦漢以前古訓也。易曰旁通情也。禮運曰講信脩睦謂之人利。易曰利者義之和。故文言以利屬情以貞屬性也。

周易乾象曰乾道變化各正性命。

按此卽所謂天道也。性命皆由天道而出。出之者天也。王者受天命而正性。臣民庶物亦各正性命也。周易於命字內加出性字。自此彖始。荀悅申鑒雜言篇曰。易稱乾道變化各正性命。是言萬物各有性也。觀其所感而天地萬物之情可見矣。是言情者應感而動者也。昆蟲草木皆有性焉。不盡善也。天地聖人皆稱情焉。不主惡也。按荀氏之說漢以前古訓也。

周易萃彖曰用大牲吉利有攸往順天命也。

按此卽孟子所說聖人之得天道王天下也。

周易繫辭傳樂天知命故不憂。

按此言易筮至神。筮者樂天知命無六極之憂。卽孟子所說性也有命焉。君子不謂性也。論語孔子曰五十而知天命不知命無以爲君子也。與此道同。

周易繫辭傳一陰一陽之謂道繼之者善也成之者性也。

按善卽元也。故尙書曰：惇德允元，成之者性。卽孟子所說命也。有性焉，君子不謂命也。周易繫辭傳：成性存存，道義之門。

按此言易行乎天地之中，天地能成人與萬物之性，人能自成以性，卽所謂成之者性也。存存，在在也。如孟子所說存其心養其性也。道義由此而入，故曰門也。此與老子衆妙之門不同。

周易說卦傳：窮理盡性，以至於命。將以順性命之理。

按理，卽禮記樂記天理滅矣之理。性命，卽孟子性也有命焉，命也有性焉之性命。聖人作易通天道，故窮理盡性以至於命也。

孝經：天地之性，人爲貴。人之行，莫大於孝。孝莫大於嚴父。嚴父莫大於配天。則周公其人也。父子之道，天性也。

按此經言天地之性，可見性必命於天也。言人爲貴，可見人與物同受天性。惟人有德行，行首於孝，所以爲貴。而物則無之也。所以孟子曰：仁之於父子也，命也。有性焉，君子不謂命也。孝經孔子言性，祇此二性字。論語孔子言性，祇性相近也。一性字，共三字而已。如果李習之所說復性爲是，何以孔子孝經論語中無此說也。孔子教顏子，惟聞復禮，未聞復性也。

論語：子曰：五十而知天命，不知命，無以爲君子也。

按孔子最重知天命。知天命無所不包。孟子性也命也兩節。卽知命之傳也。孔子所知之天命。卽孟子所說之命也。孔子不得位。不能以禮義施於君臣。且不得久居人國。以禮敬施於賓主。能知賢而不能達善。不能得天道。故世無用孔子者。孔子所以不能爲東周。孔子年至五十知之定矣。

又韓詩外傳曰。子曰。不知命。無以爲君子。言天之所生。皆有仁義禮智順善之心。不知天之所以命生。則無仁義禮智順善之心。謂之小人。故曰。不知命。無以爲君子。小雅曰。天保定爾。亦孔之固。言天之所以仁義禮智。保定人之甚固也。大雅曰。天生蒸民。有物有則。民之秉彜。好是懿德。言民之秉德。以則天也。不知所以則天。又焉得爲君子乎。按此亦漢人之說。專言德命。未言祿命。然皆爲孟子兩節所包矣。又孔子曰。畏天命。亦此義也。

論語

子貢曰。夫子之文章。可得而聞也。夫子之言性與天道。不可得而聞也。

按史記世家作夫子之言天道與性命。不可得而聞。所以與今論語不同者。非所見本有異。此乃太史公傳真孔安國之學。以說論語。加一命字。更顯明也。此性字連命字爲言。更見性命卽關乎天道。此天道卽孟子所說聖人之於天道之天道也。卽孔子五十所知之天命也。天道非聖人所能逆知。故曰不可得而聞。孟子以性命多互說之。其道乃顯。孟子受業於子思。所謂微言大義者。其在斯乎。子貢曰。不可得而聞。乃歎學者不能盡人而皆得聞之。非子貢亦真不聞也。

論語子曰性相近也習相遠也子曰唯上智與下愚不移

按性中雖有秉彜而才性必有智慧之別然愚也非惡也智者善愚者亦善也古人每言才性卽孟子所謂非才之罪也

詩深則厲淺則揭鄭箋云以水深淺喻男女之才性

之悖於諸經然以下愚爲惡誤矣或者更欲以性爲至靜至明幾疑孔子下愚之言爲有礙則更誤矣尙書召誥曰今天其命哲此言甚顯哲與愚相對哲卽智也有吉必有凶有智必有愚周公曰既命哲者言所命非愚然則愚亦命之所有但今若生子在厥初生自貽哲命耳孔子之言與召誥之言無少差謬學者曷不引以證之

古人言人性之上者曰哲曰智皆與愚字相對相反絕未言及靈字言靈者道家之說也說文靈爲以玉事神或从巫故靈爲

神靈之稱在神則是美稱在人則是惡稱故曾子曰神靈者品物之本也陽之精氣曰神陰之精氣曰靈楚辭曰橫大江兮揚靈夫惟靈修之故也毛詩之靈靈沼靈雨禮記之四靈皆兼神靈之義周易書證法極知鬼神曰靈故莊子則陽注曰靈卽是無道之謬也自莊子天地始有大愚者終身不靈之語使靈字與愚字相對而相反言人談學者喜此字虛明妙覺勝于言哲言智于是古文尙書秦誓始有惟人萬物之靈之語自有此語學者幼而讀之長而習之忘其本矣是以劉孝標辨命論全是乎學有聖人言命以窮性靈之語不知莊子心靈本是乎學故莊子鍾充符曰不可入于靈臺庚桑楚曰不可內于靈臺注曰靈臺者心也故以心靈爲學者自莊子始而釋家明鏡心臺之論實襲之于莊子釋要于莊可也偏轉襲于釋不可也

又按韓文公原性

篇謂孟子性善之說得上而遺下蓋文公以子魚楊食我等爲性惡也然此正是孔子所謂不移之下愚也非惡也如以性善爲非則蒸民之詩物則秉彜之古訓不足式矣況召誥所謂若生子罔不

在厥初生。今天其命哲。正是孔子上智下愚之分。有哲卽有愚。哲者愚之對。子魚楊食我等。天命下愚而更習惡也。

論語曰。死生有命。富貴在天。不幸短命死矣。亡之命矣夫。

按此皆明以生死富貴爲天命。以孟子性也命也兩節合之。則正變各義無不備矣。

禮記中庸。天命之謂性。率性之謂道。修道之謂教。道也者。不可須臾離也。可離非道也。是故君子戒慎乎其所不覩。恐懼乎其所不聞。莫見乎隱。莫顯乎微。故君子必慎其獨也。喜怒哀樂之未發。謂之中。發而皆中節。謂之和。中也者。天下之大本也。和也者。天下之達道也。致中和。天地位焉。萬物育焉。

按性與命。今分兩事兩字。而中庸曰。天命之謂性。是命卽所以爲性。性卽所以爲命。與孟子所說不謂性不謂命。若合符節。子思之學。傳於孟子。一步不失也。修道之教。卽禮運之禮。禮治七情十義者也。七情乃盡人所有。但須治以禮而已。卽召誥所謂節性也。若以性本光明。受情之昏。必去情而始復性。此李習之惑於釋老之說也。不覩不聞。卽不愧屋漏之說也。非如釋氏寂靜無眼耳鼻舌身意也。未發之中。卽禮記樂記所謂人生而靜。天之性也。中卽左傳所謂民受天地之中以生之中。中者有形有質。有血氣心知。特未至喜怒哀樂時耳。發而中節。卽節性之說也。有禮有樂。所以旣節且和也。天地位。萬物育。卽周易所謂各正性命也。

禮記中庸。自誠明謂之性。自明誠謂之教。誠則明矣。明則誠矣。惟天下至誠。爲能盡其性。能盡人之性。則能盡物之性。能盡物之性。則可以贊天地之化育。可以贊天地之化育。則可以與天地參矣。

按中庸此節性教。卽申言首節之性教也。所謂至誠者。祇是由治民獲上信朋友順親以至反身明善而已。所謂繼之者善也。成之者性也。非有辛妙靜明之道也。所謂明善者。則祇自博學審問慎思明辨篤行五事。事事著力實地而來。一事不實弗措。非虛靜而專明心也。雖愚必明。言明善也。自誠明謂之性。言智人率性不待教也。卽孟子所謂有性焉之命也。自明誠謂之教。言愚人受教能節性也。卽孟子所謂有命焉之性也。非如李習之所說覺照而復性也。儒釋之分在乎此。

禮記中庸。故君子尊德性而道問學。

按鄭氏注曰。德性謂性至誠者。卽孟子所說有性焉之性。召誥既哲又節之性也。道問學。卽修道之教。卽學問思辨行也。

禮記禮運。何謂人情。喜怒哀樂愛惡欲七者。弗學而能。何謂人義。父慈子孝。兄良弟弟。夫義婦聽。長惠幼順。君仁臣忠。十者謂之人義。講信修睦。謂之人利。爭奪相殺。謂之人患。故聖人之所以治人。七情修十義。講信修睦。尙辭讓。去爭奪。舍禮何以治之。飲食男女。人之大欲存焉。死亡貧苦。人之大惡存焉。故欲惡者。心之大端也。人藏其心。不可測度也。美惡皆在其心。不見其色也。欲一以窮之。舍禮何以哉。

按此所謂七情。卽包在孟子所說性也之中。所謂十義。卽包在孟子所說命也之中。而孟子所說君子不謂性不謂命。卽是此篇以禮治之之道。心之大端。治之必以禮。禮儀三百。威儀三千。非可以靜觀寂守者也。

禮記樂記。人生而靜。天之性也。感於物而動。性之欲也。物至知知。然後好惡形焉。好惡無節於內。知誘於外。不能反躬。天理滅矣。夫物之感人無窮。而人之好惡無節。則是物至而人化物也。人化物也者。滅天理而窮人欲者也。

按樂記人生而靜。天之性也。二句。就外感未至時言之。樂卽外感之至易者也。卽孟子所說耳之於聲也。性也。孟子所說有命焉。君子不謂性也。卽樂記反躬節人欲之說也。欲生於情。在性之內。不能言性內無欲。欲不是善惡之惡。天旣生人以血氣心知。則不能無欲。惟佛教始言絕欲。若天下人皆如佛絕欲。則舉世無生人。禽獸繁矣。此孟子所以說味色聲臭安佚爲性也。欲在有節。不可縱。不可窮。若惟以靜明屬之於性。必使說性中本無欲而後快。則此經文明云性之欲也。欲固不能離性。而自成爲欲也。記又曰。六者非性也。感於物而后動。此亦言哀樂喜怒愛敬。乃樂音之哀樂喜怒愛敬。非人性之哀樂喜怒愛敬。先王以樂之哀樂喜怒愛敬。感人性情之哀樂喜怒愛敬也。竊釋氏之言者。必願拒六者於性之外。尊性爲至靜至明至覺。無情無欲。其如與禮記孟子之言不合何。又按周

易繫辭傳曰。易。无思也。无爲也。寂然不動。感而遂通天下之故。此節所言。乃卜筮之鬼神。處於无思。无爲。寂然不動之處。因人來卜筮。感而遂通。非言人。无思。无爲。寂然不動。物來感之而通也。與禮記樂記。人生而靜。感於物而動。性之欲也。爲音樂言之者。不相牽涉。而佛書內有言。佛以寂靜明覺爲主者。晉唐人樂從其言。返而索之於儒書之中。得樂記斯言。及周易寂然不動之言。以爲相似。遂傳會之。以爲孔孟之道本如此。恐未然也。

又按。易此節曰。寂然不動。感而遂通天下之故。非天下之至神。其孰能與於此。此言神道在易筮之內。寂然不動。凡有人來筮者。能因人感而知天下之故。所以易道爲天下之至神。非說儒者之身心。寂然不動。有感遂通也。否則天下至神。雖周孔不能。況一介儒士乎。李習之之言性。以靜而通。照物來皆應。試問忠孝不能說在性之外。若然。則是臣子但靜坐無端倪。君來則我以忠照之。父母來則我以孝照之。而我於忠孝過而曾無留滯。試思九經中有此說否。

禮記樂記則性命不同矣。

按。此言君臣貴賤羣類不同。各有性命。卽召誥所說罔不在厥初生。亦卽詩所謂實命不同也。禮記樂記。夫民有血氣心知之性。而無喜怒哀樂之常。應感起物而動。然後心術形焉。

按。此血氣心知。卽孟子所謂性也有命焉。命也有性焉。應感起物而動。卽中庸喜怒哀樂之既發也。

有血氣無心知非性也。有心知無血氣非性也。

禮記王制司徒修六禮以節民性。

按此節性卽書召誥所說之節性亦卽中庸修道之謂教也。

孟子告子曰生之謂性孟子曰生之謂性也猶白之謂白與。

按性字本從心從生先有生字後造性字商周古人造此字時卽已諧聲聲亦意也然則告子生之謂性一言本不爲誤故孟子不驟闢之而先以言問之曰生之謂性也猶白之謂白與蓋生之謂性一句爲古訓而告子誤解古訓竟無人物善惡之分其意中竟欲以禽獸之生與人之生同論與孝經人爲貴之言大悖是以孟子據其答應之然字而以羽雩至犬牛人之性不同闢之蓋人性雖有智愚然皆善者也所謂有命焉君子不謂性也孟子非闢其生之謂性之古說也釋氏視人性太過竟欲歸於寂靜告子視人性不及幾欲儕於蠢動惟詩書孔孟之言得其中。

孟子告子曰食色性也仁內也義外也非內也。

按告子言性杞柳湍水矢口卽誤者因不能得詩書言性之傳而但習滑稽之辨也孟子最深於詩書得孔子子思之教故言之最質實無差謬也告子此章食色性也四字本不誤其誤在以義爲外故孟子此章惟闢其義外之說而絕未闢其食色性也之說若以告子食色性也之說爲非然則孟

子明明自言口之於味目之於色爲性矣。同在七篇之中。豈自相矛盾乎。

孟子公都子曰。告子曰。性無善無不善也。或曰。性可以爲善。可以爲不善。是故文武興。則民好善。幽厲興。則民好暴。或曰。有性善。有性不善。是故以堯爲君而有象。以瞽瞍爲父而有舜。以紂爲兄之子。且以爲君。而有微子啓王子比干。今日性善。然則彼皆非與。孟子曰。乃若其情。則可以爲善矣。乃所謂善也。若夫爲不善。非才之罪也。惻隱之心。人皆有之。羞惡之心。人皆有之。恭敬之心。人皆有之。是非之心。人皆有之。惻隱之心。仁也。羞惡之心。義也。恭敬之心。禮也。是非之心。智也。仁義禮智。非由外鑠我也。我固有之也。弗思耳矣。故曰。求則得之。舍則失之。或相倍蓰而無算者。不能盡其才者也。詩曰。天生蒸民。有物有則。民之秉夷。好是懿德。孔子曰。爲此詩者。其知道乎。故有物必有則。民之秉夷也。故好是懿德。

按。天生民有物有則。卽天命之謂性也。民之秉夷。好是懿德。卽性善也。孟子性善之說。以此詩爲據。故如山嶽之不可撼搖。性善之說始於詩。不始于孟子。告子等坐不習詩教耳。凡言性命者。舍五經質實之言。而別求高妙。末有不誤者。好是懿德。卽洪範所說攸好德。有物有則。卽春秋左傳劉子所說動作禮義威儀之則。

孟子。孟子曰。盡其心者。知其性也。存其心。養其性。所以事天也。殀壽不貳。修身以俟之。

按。聖賢言天命有一定者。不貳。卽一定也。然命雖不貳。而可修可祈。修身之說。卽召誥所說德之用。

祈天永命也。修身。卽孟子所說君子不謂性不謂命也。養其性。卽召誥所說節性也。

孟子曰。莫非命也。順受其正。是故知命者不立乎巖墻之下。盡其道而死者。正命也。桎梏死者。非正命也。

按。孟子此節言性命。乃聖賢至周密至質實之道。易曰。各正性命。天正性命以與人。人必正性命以事天。乃所謂知命。乃所謂盡性。卷阿天保。保定福祿。固正命也。然邾子利民而卒。亦知命正命也。比干諫而死。伯夷叔齊餓而死。亦正命也。顏子短命。曾子啓手足。亦正命也。皆盡道者也。中庸天命之謂性。率性之謂道。卽此道也。道以忠孝爲本。比干夷齊不死。是不忠。曾子手足有傷。是不孝。盡其道。則盡忠孝。秉夷物則之道也。曾子曰。吾知免夫。謂免桎梏巖墻之類也。

孟子曰。形色。天性也。惟聖人然後可以踐形。

按。此形色。趙岐注。以體貌言之。尙書洪範。五曰考終命。五曰惡。鄭康成亦如此。以形色言之。此漢以前經師相傳之舊說也。

孟子曰。堯舜性之也。湯武身之也。五霸假之也。

按。趙岐曰。性之性。好仁自然也。

孟子曰。口之於味也。目之於色也。耳之於聲也。鼻之於臭也。四肢之於安佚也。性也。有命焉。君子不

謂性也。仁之於父子也。義之於君臣也。禮之於賓主也。智之於賢者也。聖人之於天道也。命也。有性焉。君子不謂命也。漢趙岐注曰。口之甘美味。目之好美色。耳之樂音聲。鼻之喜芬香。四體謂之四肢。四肢懈倦。則思安佚不勞苦。此皆人性之所欲也。得居此樂者。有命。祿人不能皆如其願也。凡人則任情從欲而求可樂。君子之道。則以仁義爲先。禮節爲制。不以性欲而苟求之也。故君子不謂之性也。仁者得以恩愛施於父子。義者得以理義施於君臣。好禮者得以禮敬施於賓主。知者得以明智知賢達善。聖人得以天道王於天下。此皆命祿遭遇。乃得居而行之。不遇者不得施行。然亦才性有之。故可用也。凡人則歸之命祿。任天而已。不復治性。以君子之道。則修仁行義。修禮學智。庶幾聖人。聲聲不倦。不但坐而聽命。故曰君子不謂命也。

孟子曰。動心忍性。增益其所不能。

按此章乃孔子言性與天道之大義。必得此性命兩節相通相互而言之。則五經性命之古訓無不合矣。晉唐人嫌味色聲臭安佚爲欲。必欲別之於性之外。此釋氏所謂佛性。非聖經所言天性。梁以後言禪宗者。以爲不立文字。直指人心。乃見性成佛。明頓了無生。試思以此言性。豈有味色。此與李習之寂照復性之說又遠。與孟子之言更遠。惟孟子直斷之曰性也。且曰君子不謂性。則召誥之節性。卷阿之彌性。西伯戡黎之虞天性。周易之盡性。禮記中庸之率性。皆範圍曲成。無不合矣。趙岐謂

仁施父子。義施君臣者。如武王周公爲子。周公召公爲臣。此命之得以仁義施者也。命也。亦性也。若以舜爲瞽瞍之子。比干爲紂之臣。此處變不得以仁義施者也。亦命也。然有性焉。仁義存乎性。舜必以底豫而修仁。比干必以諫死而行義。舜與比干。不諉父頑君虐於命也。禮敬施於賓主。如孔孟適各國終無所遇。聖人得天道王天下。如武王滅商有天下。孔子不得爲東周。衰不夢周公。此各正其道以盡性也。窮理盡性以至於命。正者正命。卽變者亦正命也。皆所以事天也。忍性者。忍食色等欲也。忍性。比節性更爲用力堅苦矣。豈靜復乎。

按唐李翱復性書曰。情之動靜弗息。則不能復其性而燭天地。爲不極之明。故聖人者。人之先覺者也。覺則明。否則惑。惑則昏。明與昏。性本無有。誠者。聖人性之也。寂然不動。廣大清明。照乎天地。感而遂通天下之故。弗慮弗思。情則不生。情既不生。乃爲正思。正思者。無慮無思也。易曰。天下何思何慮。寂然不動。邪思自息。惟性明照。情何所生。其心寂然。光照天地。是誠之明也。誠者定也。不動也。昔之注解中庸者。與生之言皆不同。何也。曰。彼以事解者也。我以心通者也。本性清明。周流六虛。所以謂之能復其性也。夫子復生。不廢吾言矣。

按商周人言性命。多在事。在事故實而易於率循。晉唐人言性命。多在心。在心故虛而易於傳會。習之此書是也。尙書毛詩。無言不管。惟周易間有虛高者。然彼因言神明陰陽卜筮之事。是以聖人繫

辭不得不就易道以言之。中庸一篇爲子思微言。故言亦或及於幽明高大之處。然無言不由實事而起。與老釋迥殊。樂於虛者。見易中庸之內寂然不動。誠則明等語。喜之。遂引之以爲證。又因禮記人生而靜。孟子先覺等語。喜之。遂亦引之爲證。不知已入老釋之域矣。按周易寂然不動。乃言卦爻未撰之先。非言人之心學也。誠則明者。乃治民獲上。信友順親之事。明善者。乃學問思辨行之事。亦非言靜寂覺照也。人生而靜。言尚未感物。非專於靜也。先覺覺民。如詩之牖民孔易。非性光明照也。此不可誣改聖經以飾釋典者也。至於釋典內有云佛者何也。蓋窮理盡性大覺之稱也。其道虛乎。固已妙絕常境。心不可以智知。形不可以象測。同萬物之爲。而居不爲之域。處言教之內。而止無言之鄉。寂寞虛曠。強名曰覺。翻釋大論佛燭嗜欲。習虛靜。而成通照也。有感斯應。體常湛然。形由感生。體非實有。魏書釋老志自性本覺。詳見於實相經。白居易文有生皆有情。菩薩乃有情中之覺者耳。佛有覺性而無情。翻釋名義佛者西天之語。唐言覺。謂人有智慧覺照爲佛心。傳鑑錄以上各釋氏之說。皆李習之復性之說所由來。相比而觀其迹。自見蓋釋氏見性。祇是明心。不但不容味色聲臭安佚存於性內。卽喜怒哀樂亦不容於性內。甚至以不生情爲正覺。性明照則情不生。然而易文言明以利貞爲情性矣。又言六爻發揮。旁通情矣。然則情可絕乎。性待復乎。恐未然矣。

又案釋氏所說直指人心見性成佛之性字似具虛寂明照淨覺之妙此在梵書之中本不知是何稱名是何字樣自晉魏翻譯之人求之儒書文字之內無一字相合足以當之者遂拈出性字遷就假借以當之彼時已在老莊清言之後蓋世之視性字者已近於釋老而離於儒矣

晉謝靈運詩云偃臥任縱誕得性非外求

王康琚詩云矯性失至理

六朝人不諱言釋不陰釋而陽儒陰釋而陽儒唐李翱爲始魏收所云虛靜通照湛然感應者此明說是佛性不言是孔孟之性不必辯也李翱所言寂然靜明感照通復者此直指爲孔孟之性斷斷不然不得已不辯也象山陽明更多染梁以後禪學矣

福謙案家大人另有塔性說一篇因其言似近于諸故不列入此卷之內然發明性字誤入老釋之故明則暢之至後刻入續三集內近于子部也

學經室一集卷十一

詁經精舍策問

兩漢學行醇實。尙近于春秋列國之時。漢末氣節甚高。黨禍橫決。激而爲放達。流而爲老莊。爲禪釋。宋儒救之。取學術中最尊者爲性理。至明儒學案紛紛矣。惟考列國時。孔曾游夏諸聖賢。及各國君卿大夫之德行名言。載在三傳國語。孝經論語者。皆爲處世接物之庸行。非如禪家遁于虛無也。卽如仁義禮讓孝弟忠順等語。與孝經各章。事事相通。語語相合。孔子曰。吾志在春秋。行在孝經。此二語實爲聖門微言。蓋春秋時學行。惟孝經春秋最爲切實正傳。近時學者。發明三代書數等事。遠過古人。于春秋學行。尙未大爲發明。本部院拙識所及。首爲提倡。諸生如不鄙其庸近。試發明之。以成精舍學業焉。

石刻孝經論語記

六經皆周魯所遺古典。而孔子述之。傳於後世。孔子集古帝王聖賢之學之大成。而爲孔子之學。孔子之學。於何書見之。最爲醇備歟。則孝經論語是也。孝經論語之學。窮極性與天道。而不涉於虛。推極帝王治法。而皆用乎中。詳論子臣弟友之庸行。而皆歸於實。所以周秦以來。子家各流。皆不能及。而爲萬世之極則也。孝經論語。皆孔門弟子所撰。而弟子之首推者。曰顏曰曾。顏子之學。曰夫子循循然善誘人。博我以

文約我以禮。故曰一日克己復禮，天下歸仁焉。非禮勿視，非禮勿聽，非禮勿言，非禮勿動。禮者何？朝覲聘射冠昏喪祭，凡子臣弟友之庸行。帝王治法，性與天道，皆在其中。詩書即文也。禮也，易象春秋亦文也。禮也，其餘言存乎大學中庸諸篇。大學中庸所由載入禮經者，以此其事皆歸實踐，非高言頓悟，所可掩襲而得者也。曾子之學，孔子曰：吾道一以貫之。曾子曰：夫子之道，忠恕而已矣。忠恕者，子臣弟友自天子至於庶人之實政實行。故曾子曰：忠者其孝之本歟？孝經之學，兼乎君卿士庶以及天下國家。曾子十篇皆由此出，其實皆盡人所同之庸行忠恕而已。故孔子曰：忠恕達道不遠。君子之道四，某未能一焉。所謂一貫者，貫者行也，事也。言壹是皆身體力行，見諸實行實事也。初非有獨傳之心頓悟之道也。貫之訓行事，見于爾雅漢書，與仍舊貫無二解也。若謂性道之學，必積久之後，而頓悟通之，則孔子十五志學以後，學與年進，未聞有不悟之時，亦未聞有頓悟之日也。顏曾所學於孔子者如此，其餘諸賢可以類推之。然則集古聖大成之道者，莫如孔子。傳孔子之道最近而無偏無弊者，莫如諸賢。孔子諸賢之言所載之書，莫如孝經論語。然則今之孝經論語，儒者終身學之不盡，太極之有無良知之是非，何暇論之？古本孝經不可見，惟漢石經論語殘字，屢有存者。金匱國子監學生錢泳好學善隸書，敬書孝經論語二經刻之石，且博訪通人定其隸法文字，泳刻將成，欲歸其石於曲阜孔子宅樹石於壁，以貽後之學者。屬元記之。

十三經義疏。周禮可謂詳善矣。賈公彥所疏者。半用六朝禮例。于禮樂軍賦諸大端。皆能引據明贍。所考證者。多在九經諸緯。而于諸子百家之單詞精義。以及文字之假借。音讀之異同。漢制之存亡。漢注之與義。皆未能疏證發明之。我朝惠半農先生。家傳漢學。所著禮說十四卷。實足補賈氏之所未及。此書雖經鏤板。而行世甚少。余于丁未年。在京師廠肆。購得一帙。反覆讀之。服其精博無比。後爲友人借去。未歸至今。深憶之。戊午夏。吳縣友人江貢廷。持一帙見示。則上海彭純甫所新刻本。余喜插架之可備。且一時同學皆得讀之也。因爲序之。余昔有志于撰周禮義疏。以補賈所未及。今宦轍鮮暇。惜難卒業。如有好學深思之士。據賈氏爲本。去其謬誤。及僞緯書。擇唐宋人說禮之可從者。加以惠氏此說。兼引近時惠定宇。江慎修。程易田。金輔之。段若膺。任子田。諸君子之說。勿拘疏不破注之例。博考而詳辨之。則此書之成。似可勝于賈氏。是所望于起而任之者。彭君家貧。好古多讀書。聞此書之刻。貨皆出館穀。何其賢也。

胡肫明先生易圖明辨序

元幼學易。心疑先後天諸圖之說。庚子得毛西河先生全集。中河圖洛書原舛篇。讀之豁然得其源委。友人欽凌次仲廷堪謂元曰。子知西河之辨易。未見吳興胡肫明先生易圖明辨。尤詳備也。元誠之。求其書不可得。繼在京師。見四庫館書目錄之。曰。其書一卷。辨河圖洛書。二卷。辨五行九宮。三卷。辨參同契先天圖太極圖。四卷。辨龍圖易數鉤隱圖。五卷。辨啓蒙圖書。六卷。七卷。辨先天古易。八卷。辨後天之學。九卷。辨

卦變十卷辨象數流弊引据經典原原本本于易學深爲有功元向往益切丙辰視學至吳興始求得讀之蓋距所聞已十六年矣魏聞道之甚遲喜斯編之未泯亟命其家修板刷印廣爲流傳以貽學者因竝識其事于篇首至其辨圖大略則萬季野先生敍言之已盡茲不贅論

漢讀考周禮六卷序

稽古之學必確得古人之義例執其正窮其變而後其說之也不誣政事之學必審知利弊之所從生與後日所終極而立之法使其弊不勝利可持久不變蓋未有不精於稽古而能精於政事者也言韻者多矣顧詩三百篇人人讀之而能知三百篇之韻者或未之有也說文解字一書人人讀之而許氏全書之例未之知則許之可疑者多矣訓詁必宗漢人漢人之說經傳也或言讀爲讀曰或言讀如讀若或言當爲作義疏者一切視之學者概謂若今之音切而已其誣古不亦甚哉聖朝右文超軼前古淳氣鬱積金壇段若膺先生生於其間掣摩經籍甄綜百氏聰可以辨牛鐸舌可以別淄澠巧可以分風壁流其書有功於天下後世者可得而言也其言古音也別支佳爲一脂微齊皆灰爲一之哈爲一職德者之入術物迄月沒曷末黠鐸薛者脂之入陌麥昔錫者支之入自唐虞至陳隋有韻之文無不印合而歌麻近支文元寒刪近脂尤幽近之古音今音皆可得其條貫此先生之功一也其言說文也謂說文五百四十部次第以形相聯每部之中次第以義相屬每字之下兼說其古義古形古音訓釋者古義也象某形從某

某聲者，古形也。云某聲，云讀若某者，古音也。三者合而一篆乃完也。其引經傳有引以說古義者，以轉注假借分觀之。如尚書曰：「至於岱宗，柴。詩曰：『祝祭于嘏。』」說之之本義也。如商書曰：「無有作故。」周書曰：「布重黃。」席說假借此字之義也。有引以說古形者，如易曰：「百穀艸木麗于地。」說艸從艸麗之意。易曰：「豐其屋。」說豐從「豐」之意。易曰：「突如其來。」說去從倒子之意。易曰：「先庚三日。」說庸從庚之意。是也。有引以說古音者，如說文讀若詩施風濊濊，齋讀若子達汝弼，是也。學者以其說求之，斯說文無不可通之處。說文無不可通之處，斯經傳無不可通之處矣。此先生之功二也。至若漢讀攷敘例，謂讀如，主於說音，讀爲，主於更字，說義當爲，主於糾正誤字，如者，比方之詞，爲者，變化之詞，當爲者，糾正之詞，讀如，不易其字，故下文仍用經之本字，讀爲，必易其字，故下文乃用所易之字。說文者，說字之書，故有讀如，無讀爲，說經傳之書，則必兼是二者。自先生此言出，學者凡讀漢儒經子漢書之注，如夢得覺，如醉得醒，不至如冥行摘埴。此先生之功三也。蓋先生於語言文字，剖析如是，則於經傳之大義，必能互勘而得其不易之理可知。其爲政亦必能剖析利弊源流，善爲之法，又可知。而一行作吏，卽引疾養親，食貧樂道，二十年所矣。其諸所得於己者深歟。先生說經之書，尚有毛詩訓故傳微，毛詩小學，古文尚書撰異，皆深識大源，不爲億必之言，行將盡以餉學者云。

任子田侍御弁服釋例序

元居在江淮間。鄉里先進多治經之儒。若興化顧進士文子。九苞。李進士成裕。傳。劉廣文端臨。台拱。任侍御

子田。大椿。王黃門石驪。念孫。汪明經容甫。中。皆耳目所及。或奉手有所受。丁未戊申間。元在京師。見任侍御。

相問難爲尤多。侍御卒後。所著弁服釋例。傳之弟子山陽汪祭酒瑟菴。廷珍。蕭山王進士晚聲。紹蘭。從祭酒

手錄以歸其兄進士穀塍。宗炎。亦遂於經。爲吳會宿儒。乃手校訛舛。寫以付梓。問序于元。元謂侍御早年

以詞學名世。繼乃專研經史。與修四庫書。書之提要。多出其手。所輯呂忱字林深衣釋例諸書。已付刻。茲
秩釋弁服所用之例。以五禮區之。凡百四十餘事。綜覽經疏史志。參微訂訛。燦然經緯畢著矣。侍御吾鄉
先進也。瑟菴晚聲吾友也。今得穀塍校成之。學者傳習不墜。元序之。奚敢辭。

張皋文儀禮圖序

儀禮圖六卷。張編修惠言之所述也。編修字皋文。武進人。乾隆丙午中式舉人。嘉慶己未進士。改庶吉士。
充實錄館纂修官。武英殿協修官。辛酉散館。授翰林院編修。方以學問文章受知于朝。不幸早卒。子壘于
鄉。與編修爲同榜。其舉進士。乃予總裁會試所取予知之也。久故序而論之。編修幼孤家至貧。母姜孀人
撫以成立。及長。修學立行。敦禮自守。性剛而廉。貌若和易。而中不可干。其爲人勤于事。親友子弟。睦于族
姻。鄉之善士。無勿友也。與人審而後交。交者必端。凡爲其友者。無不稱之敬之。其爲學博而精。旁探百氏。

要歸六經而尤深易禮。居位婦人憂喪祭法儀禮爲時所推。嘗遊京師大名杭欽問及官京師弟子先後從受易禮者以十數其所著有周易虞氏義虞氏消息虞氏易禮易事易候易言周易鄭荀義易義別錄易圖條辯儀禮圖說文諧聲譜墨子經解據奇經正義青囊天玉通解及文集四編詞一編凡十六種編修既精治易禮所著以周易虞氏義儀禮圖爲最周易虞氏義虞氏消息予已刊行之惟儀禮圖六卷今年春始得于武進董君處見其手錄本董君名士錫編修之高弟子卽編修之女婿也因屬董君校寫刻之于板昔漢儒習儀禮者必爲容故高堂生傳禮十七篇而徐生善爲頌禮家爲頌皆宗之頌卽容也後儒以進退揖讓爲末節薄之不講故言朝則昧于三朝三門言廟則闕于門揖曲揖言寢則眩于房室階夾言堂則誤于楹間階上辨之不精儀節皆由之舛錯而不可究非其蔽歟宋楊復作儀禮圖雖禮文完具而位地或淆編修則以爲治儀禮者當先明宮室故兼采唐宋元及本朝諸儒之義斷以經注首述宮室圖而後佐圖比事按而讀之步武朗然又詳考古凶冠履之制爲之圖表又其論喪服由至親期斷之說爲六服加降表貫穿禮經尤爲明著予嘗以爲讀禮者當先爲頌昔叔孫通爲綿蕤以習儀他日亦欲使家塾子弟盡地以肄禮庶于治經之道事半功倍也然則編修之書非卽徐生之頌乎

王實齋大戴禮記解詁序

王實齋

聘珍

著大戴禮記解詁十三卷目錄一卷其言曰大戴與小戴同受業于后倉各取孔壁

古文記。非小戴刪大戴。馬融足小戴也。禮察保傳語及秦亡。乃孔襄等所合藏。是賈誼有取于古記。非古記采及新書也。三朝記曾子乃劉氏分屬九流。非大戴所哀集也。其校經文也。專守古本爲家法。有愆于近日諸儒。妄據他書。徑改經文之失。其爲解詁也。義精語潔。恪守漢法。多所發明。爲孔搆約諸家所未及。能使三千年孔壁古文。無隱滯之義。無虛造之文。用力勤而爲功鉅矣。元從北平翁覃溪先生得識王君。王君厚重誠篤。先大夫敬之。以爲有古人風。無南人浮競之習。延教家塾子弟者有年。王君書成。屬序于元。元更出元素校大戴本付王君。王君或以己所校者衡量之。加以弃取。別爲大戴記作釋文數卷。不更善乎。

春秋公羊通義序

昔孔子成春秋。授於子夏。所謂以春秋屬商是也。子夏口說以授公羊高。高五傳至漢景帝時。乃與齊人胡毋生始著竹帛。其後有嚴彭祖顏安樂兩家之學。宣帝爲之立博士。故公羊之學。兩漢最勝。雖劉歆鄭衆賈逵謂公羊可奪。左氏可興。而終不能廢也。然說者既多。至有倍經任意者。任城何君起而修之。賈精竭思。閉門十有七年。乃有成書。略依胡毋生條例而作解詁。學者稱精奧焉。六朝時。何休之學。猶盛行於河北。厥後左氏大行。公羊幾成絕學矣。我朝經術昌明。超軼前代。諸儒振興。皆能表章六經。修復古學。而曲阜聖裔孔襲軒先生。思述祖志。則從事於公羊春秋者也。先生幼秉異資。長通絕學。凡漢晉以來之治

春秋者不下數百家。靡不綜覽。嘗謂左氏舊學。湮於征南。穀梁本義。汨於武子。王祖游謂何休志通公羊。往往爲公羊疚病。其餘啖助趙匡之徒。又橫生義例。無當於經。唯趙訪最爲近正。何氏體大思精。然不無承訛率臆。於是旁通諸家。兼采左穀。擇善而從。撰春秋公羊通義十一卷。序一卷。凡諸經精義有可通於公羊者。多著錄之。其不同於解詁者。大端有數事焉。謂古者諸侯分土而守。分民而治。有不純臣之義。故各得紀年於其境內。而何邵公猥謂唯王者然後改元立號。經書元年爲託王於魯。則自蹈所云。反傳違戾之失矣。其不同一也。謂春秋分十二公而爲三世。舊說所傳聞之世。隱桓莊閔僖也。所聞之世。文宣成襄也。所見之世。昭定哀也。顏安樂以爲襄公二十三年。邾婁鼻我來奔。云邾婁無大夫。此何以書。以近書也。又昭公二十七年。邾婁快來奔。傳云邾婁無大夫。此何以書。以近書也。二文不異同宜一世。故斷自孔子生後卽爲所見之世從之。其不同二也。謂桓十七年經無夏。二家經皆有夏。獨公羊脫耳。何氏謂夏者陽也。月者陰也。去夏者明夫人不繫於公也。所不敢言。其不同三也。謂春秋上本天道。中用王法。而下理人情。天道者。一曰時。二曰月。三曰日。王法者。一曰譏。二曰貶。三曰絕。人情者。一曰尊。二曰親。三曰賢。此三科九旨。而何氏文諡例云。三科九旨者。新周故宋。以春秋當新王。此一科三旨也。又云所見異辭。所聞異辭。所傳聞又異辭。二科六旨也。又內其國而外諸夏。內諸夏而外夷狄。是三科九旨也。其不同四也。他如何氏所據。間有失者。多所裨損。以成一家之言。又謂左氏之事詳。公羊之義長。春秋重義不重事。是可謂

好學深思。心知其意者矣。故能醇會貫通。使是非之旨。不謬於聖人。豈非至聖在天之靈。懼春秋之失憎。篤生文孫。便明絕學哉。元爲聖門之甥。陋無學術。讀先生此書。始知聖志之所在。因敬敘之。

國朝漢學師承記序

兩漢經學所以當尊行者。爲其去聖賢最近。而二氏之說尙未起也。老莊之說。盛於兩晉。然道德莊列。本書其義。止於此而已。後人不能以己之文字。飾而改之。是以晉以後鮮樂言之者。浮屠之書。語言文字。非譯不明。北朝淵博高明之學士。宋齊聰穎特達之文人。以己之說。傳會其意。以致後之學者。繹之彌悅。改而必從。非釋之亂儒。乃儒之亂釋。魏收作釋老志後。踪跡可見矣。吾固曰兩漢之學純粹以精者。在二氏未起之前也。我朝儒學篤實。務爲其難。務求其是。是以通儒碩學。束髮研經。白首而不能究。豈如朝立一旨。暮卽成宗者哉。甘泉江君子屏。得師傳于紅豆惠氏。博聞強記。無所不通。心貫羣經。折衷兩漢。元幼與君同里同學。竊聞論說三十餘年。江君所纂國朝漢學師承記八卷。嘉慶二十三年。居元廣州節院時刻之。讀此可知漢世儒林家法之承授。國朝學者經學之淵源。大義微言。不乖不絕。而二氏之說不攻自破矣。元又嘗思國朝諸儒說經之書甚多。以及文集說部。皆有可采。竊欲析縷分條。加以翦截。引繫於羣經各章句之下。譬如休寧戴氏解尚書光被四表爲橫被。則繫之堯典。寶應劉氏解論語哀而不傷。卽詩惟以不永傷之傷。則繫之論語八佾篇。而互曰周南。如此勒成一書名曰大清經解。徒以學力日荒。政

事無暇而能總此事審是非定去取者海內學友惟江君暨顧君千里二三人他年各家所著之書或不盡傳與義單辭淪替可惜若之何哉歲戊寅除夕序于桂林行館

孔檢討廣錄大戴禮記補注序

今學者皆治十三經至兼舉十四經之目則大戴禮記宜急治矣夏小正爲夏時書禹貢惟言地理茲則言天象與堯典合公冠諸侯遷廟豐廟朝事等篇足補儀禮十七篇之遺盛德明堂之制爲考工記所未備孔子三朝記論語之外茲爲極重曾子十篇儒言純粹在孟子之上投壺儀節較小戴爲詳哀公問字句較小戴爲確然則此經宜急治審矣顧自漢至今惟北周盧僕射爲之注且未能精備自是以來章句湊淆古字更舛良可慨歎近時戴東原庶常盧紹弓學士相繼校訂蹊逕漸闢曲阜孔編修鄭軒乃博稽羣書參會衆說爲注十三卷使二千餘年古經傳復明於世用力勤而爲功鉅矣元從編修之嗣昭虔得觀是書編修之弟廣廉付刻元爲序之元鄉亦曾治是經有注有釋鄙陋之見與編修間有異同今編修書先行元寫定後再以質之當世治經者

焦里堂循羣經宮室圖序

焦君里堂作羣經宮室圖二卷凡九類曰城曰宮曰門曰屋曰社稷曰宗廟曰明堂曰壇曰學爲圖五十篇皆于衆說分隨羣言岨嶇之際尋繹經文而折衷之圖所不能詳者復因圖爲說以附于後其所見似

翔而得夫經之意也。其所解似新，而適合乎古之制也。嗚呼！用力可謂勤矣。顧其書往往異于先儒之舊學，侶或致疑焉。余以爲儒者之于經，但求其是而已矣。是之所在，從注可；違注亦可，不必定如孔賈義疏之例也。歟！程易用孝廉近之善說經者也。其說考工戈戟鐘磬等篇，率皆與鄭注相違，而證之於古器之僅存者，無有不合。通儒傾學，咸以爲不刊之論。未聞以違注見譏。蓋株守傳注，曲爲附會，其弊與不從傳注憑臆空談者等。夫不從傳注憑臆空談之弊，近人類能言之，而株守傳注曲爲附會之弊，非心知其意者，未必能言之也。元向有考工記車制圖解，其說亦頗異于鄭君。今得里堂此書，而鄙見爲不孤矣。圖中新定路寢之制，吾友凌次仲移書爭之。元謂里堂所抒者，心得也。次仲所持者，舊說也。昔許氏爲五經異義，而鄭君駁之。何氏爲公羊墨守，而鄭君發之。究之各成其是。於叔重邵公無損也。里堂以藁本寄都示元，元學殖甚荒落，無以益里堂。聊書平昔之所見者而歸之。里堂其以余說爲然乎否耶？

與臧拜經書

皋陶謨，撻以記之以下七十四字，或疑亦僞孔所增。由淵如觀察暨足下所說推之，元竊未敢定也。蓋所以疑之者，其大端有五：一則史記夏本紀敘此經文于侯以明之下，直接禹曰兪，無此七十四字也；一則馬鄭逸經注，絕無此七十四字注也；一則說文引撻以記之爲周書也；一則鄭注鄉射取扑，但引尙書扑作教刑，不引撻以記之也；一則公羊疏稱敷奏以言三句爲逸書也。按史記引尙書本有刪節之處，不獨

此七十四字爲然。卽如皋陶謨一日二日萬幾天敘有典等二十餘句。亦未引之。故史記所未引。未可以爲本。無此七十四字之確據。僞孔但能割堯典爲舜典。割皋陶謨爲益稷。無他技也。舜典首二十八字。并僞孔亦不能造。直至姚方輿始僞獻于朝。舉朝集議。咸以爲非。如果僞孔增出七十四字。當年朝議無論是非之。但必有及之者。六朝以來。不容絕無一語及之也。馬鄭逸注。或有或無。本難深據。況其存者多出史記注中。今史記既無此段書文。則注亦因之而佚矣。說文撻古文遽。引周書遽以記之。段氏若膺已謂从危乃从支之訛。周乃虞之訛。既可訛支爲危。寧不容訛虞爲周也。元且謂遽卽虞字上半。所由致誤也。儀禮鄉射經文。但有扑字。本無撻字。鄭之但引扑作教刑。不引撻以記之。宜也。公羊何休學引尙書曰。羣后四朝。敷奏以言。明試以功。車服以庸。明是虞書。而徐彥疏誤爲逸書。如果逸書一語出自何氏。尙有可疑。若徐氏直刊本之誤耳。春秋繁露潛夫論。皆漢人之書。其引車服有庸。皆連誰敢不讓敢不敬應二句。若以此二語爲說堯典者之詞。亦無確據。且僞孔苟作僞。則羣服賦納頗見新異。曷不用之。而反用誰代疇。用庶代試也。其餘小節。不必置詞。惟此五疑。究無確據。經文至重。未敢輕議。且俟異日。或者再有所考見。何如。

與洪筠軒 顧喧 論三朝記書

孔子三朝記七篇。與論語並重。今世以其文字艱深。莫之學。夫孔子之言之存于世者無多。豈可不發明。

以觀聖道哉。今子注之甚善。余紬繹之。有疑而爲解之者。爲子列之。千乘篇記曰。卿設如四體。毋易事。毋假名。毋重食。元謂易事。謂變易政事。假名。謂假人名器。重食。謂增食采邑。此皆指魯三家之弊。記曰。立有神則國家敬。此仍是鬼神之神。與四代篇昭有神明之義同。記曰。誘居家室。有君子曰義。子女專曰媼。元謂誘讀如吉士誘之誘。誘進也。君子卽詩吉士。謂主其婚者。故曰義。若子女自專。則爲姦。此記文八節。與周禮秋官司師八成相應。此一節屬周禮邦汭。當讀爲媒妁之妁。由記文推之可見。鄭司農注周禮爲斟酌刺探尙書事之誤。此邦汭如今律之姦律。周禮列在賊盜之前。三朝記列在盜之後。賊之前。甚明晰也。四代篇記曰。如艾而夷之艾。讀如刈。斷草也。夷。平也。虞戴德篇記曰。黃帝慕修之慕。乃纂字之訛。纂繼也。記曰。開施教于民。由記中東有開明推之。凡記中開字屢見。皆啓字。漢人避諱所改也。小辨篇記曰。士學順辨言以遂志。元謂順與訓通。卽爾雅釋訓之訓。遂志通意也。學訓詁。方能通絕代別國之言之意也。少閒篇記曰。不忍天下粒食之民刈戮。戮當爲句。不得以疾死。死當爲句。故字屬下。以千乘篇亦有民不得以疾死之文。下亦有故字也。凡此數事。致之子以爲何如。

十三經注疏校勘記序 十三篇

古周易十二篇。漢後至宋晁以道朱子始復其舊。自晁以道朱子以前。皆象象文言。分入上下經卦中。別爲繫辭。上下說卦。序卦。雜卦。五篇。鄭元王弼之書業已如是。此學者所共知。無庸覲縷者也。易之爲書最

古而文多異字。宋晁以道古文易、擷摭爲之。如郭忠恕薛季宣古文尙書之比。國朝之治周易者。未有過於徵士惠棟者也。而其校刊雅雨堂李鼎祚周易集解。與自著周易述。其改字多有似是而非者。蓋經典相沿已久之本。無庸突爲擅易。況師說之不同。他書之引用。未便據以改久沿之本也。但當錄其說於考證而已。^臣元於周易注疏舊有校正各本。今更取唐宋元明經本。經注本。單疏本。經注疏合本。讎校各刻同異。屬元和生員李銳筆之爲書九卷。別校略例一卷。陸氏釋文一卷。而不取他書妄改經文。以還王弼孔穎達陸德明之舊。

自梅賾獻孔傳。而漢之真古文與今文皆亡。乃梅本又有今文古文之別。新唐書藝文志云。天寶三載。詔集賢學士衛包。改古文從今文。說者謂今文從此始。古文從此絕。殊不知衛包以前。未嘗無今文。衛包以後。又別有古文也。隋書經籍志有古文尙書十五卷。今字尙書十四卷。又顧彪今文尙書音一卷。是隋以前已有今文矣。蓋變古文爲今文。實自范甯始。甯自爲集注。成一家言。後之傳寫孔傳者。從而效之。此所以有今文也。六朝之儒。傳古文者多。傳今文者少。今文自顧彪而外。不少概見。李巡、徐邈、陸德明皆爲古文作音。孔穎達正義出於二劉。蓋亦用古文本。如塗之爲黠。云之爲員。是也。然疏內不數數觀。殆爲後人竄改。如陳鄂等之於釋文。歟。然則衛包之改古從今。乃改陸孔而從范顧。非倡始爲之也。乃若天寶既改古文。其舊本藏書府。民間不復有之。更經喪亂。卽書府所藏。亦不可問矣。開成初。鄭覃進石經。悉用今文。

前此張參之壁經。後此長興之板本。廣政之石本。當無不用今文者。乃後周顯德六年。郭忠恕獨校古文。尙書上之。上距天寶三載。已二百餘年。不知郭氏從何而得其本。宋初仍不甚行至呂大防得於宋次道王仲至家。而晁公武取以刻石。薛季宣據以作訓。然後大顯。今按釋文序錄云。尙書之字。本爲隸古。既是隸寫古文。則不全爲古字。今宋齊舊本及徐李等音。所有古字。蓋亦無幾。穿鑿之徒。務欲立異。依傍字部。改變經文。疑惑後生。不可寫用。是所謂古文。不過如周禮漢書。略有古體。及假借通用之字而已。晁氏讀書志云。陸德明獨存一二於釋文。此正與古字無幾之說相合。若連篇累牘。悉是奇字。則陸氏豈得或釋或不釋哉。晁氏又云。以古文尙書校釋文。雖小有異同。而大體相類。夫釋文所存僅止一二。就此一二之中。復小有異同。則全經不合者。必十之九。其爲贋本無疑。然觀陸氏之言。則穿鑿立異。自古而然。不獨郭氏也。臣於尙書注疏。舊有校本。茲以各本授德清貢生徐養原校之。并及釋文。臣復定其是非。且考其顛末。著於簡首。

考異於毛詩。經有齊魯韓三家之異。齊魯詩久亡。韓詩則宋以前尙存。其異字之見於諸書可考者。大約毛多古字。韓多今字。有時必互相證。而後可以得毛義也。毛公之傳詩也。同一字而各篇訓釋不同。大抵依文以立解。不依字以求訓。非孰於周官之假借者。不可以讀毛傳也。毛不易字。鄭箋始有易字之例。顧注禮則立說以改其字。而詩則多不欲顯言之。亦或有顯言之者。毛以假借立說。則不言易字。而易字在

其中鄭又於傳外別傳。往往傳所不易者而易之。非好異也。亦所謂依文立解。不如此則文有未適也。孟子曰。不以文害辭。不以辭害志。孟子所謂文者。今所謂字。言不可泥於字。而必使作者之志昭著顯白於後世。毛鄭之於詩。其用意同也。傳箋分而同一毛詩。字有各異矣。自漢以後。轉寫滋異。莫能枚數。至唐初而陸氏釋文。顏氏定本。孔氏正義。先後出焉。其所遵用之本。不能盡一。自唐後至今。鈔版盛行。於經於傳。箋於疏。或有意妄更。或無意譌脫。於是繆盩莫可究詰。因以臣舊校本授元和生員顧廣圻。取各本校之。臣復定是非。於以知經有經之例。傳有傳之例。箋有箋之例。疏有疏之例。通乎諸例。而折衷於孟子不以辭害志。而後諸家之本。可以知其分。亦可以知其一定不可易者矣。

有杜子春之周禮。有二鄭之周禮。有後鄭之周禮。周禮出山巖屋壁間。劉歆始知爲周公之書而讀之。其徒杜子春乃能略識其字。建武以後。大中大夫鄭興。大司農鄭衆。皆以周禮解詁著。而大司農鄭康成。乃集諸儒之成。爲周禮注。蓋經文古字不可讀。故四家之學。皆主於正字。其云故書者。謂初獻於祕府所藏之本也。其民間傳寫不同者。則爲今書。有云讀如者。比擬其音也。有云讀爲者。就其音以易其字也。有云當爲者。定其字之誤也。三例既定。而大義乃可言矣。說皆在後鄭之注。唐賈公彥等作疏發揮。殊未得其肯綮。臣元於此經舊有校本。且合經注疏讀之時。闕見其一二。因通校經注疏之譌字。更屬武進監生戚唐菟校各本。并及陸氏釋文。臣復定其是非。凡言周制言漢學者。容有藉於此。

儀禮最爲難讀。昔顧炎武以唐石刻九經校明監本。惟儀禮譌脫尤甚。經文且然。況注疏乎。賈疏又筆元葛詞。意鬱輻不若孔氏五經正義之條暢。寫者不得其意。脫文誤句。往往有之。宋世注疏各爲一書。疏自咸平校勘之後。更無別本。誤謬相沿。迄今已無從一一釐正。朱子作通解。於疏之文義未安者。多爲刪潤。在朱子自成一書。未爲不可。而明之刻注疏者。一切惟通解之從。遂盡失賈氏之舊。臣於儀禮注疏舊有校本。奉旨充石經校勘官。曾校經文上石。今合諸本。屬德清貢生徐養原詳列異同。臣復定其是非。大約經注則以唐石經及宋嚴州單注本爲主。疏則以宋單行本爲主。參以釋文識誤諸書。於以正明刻之譌。雖未克盡得鄭賈面目。亦庶還唐宋之舊觀。鄭注疊古今文。最爲詳覈。語助多寡。靡不悉紀。今校是經。寧詳毋略。用鄭氏家法也。

小戴禮記。隋唐志並二十卷。唐石經所分是也。貞觀中孔穎達等爲正義。舊新唐志皆云七十卷。晁氏讀書志。陳氏書錄解題皆同。案古人義疏。皆不附於經注而單行。猶古春秋三傳。詩毛傳。不附於經而單行也。單行之疏。北宋皆有鐫本。今廬有存者。儀禮穀梁爾雅。間存藏書家。而他經多亡。正義多附載經注之下。其始謂之兼義。其後直謂之某經注疏。其始本無釋文。其後又附以釋文。謂之附釋音某經注疏。最後又去附釋音三字。蓋皆紹興以後所爲。而北宋無此也。有在兼義之先爲之者。今所見吳中藏本。有春秋禮記二種。春秋曰春秋正義卷第幾。禮記曰禮記正義卷第幾。皆不標爲某經注疏。其卷數則春秋三十

六卷禮記七十卷皆與唐志正義卷數合。蓋以單行正義爲主，而以經注分置之。此紹興初年所爲，非如兼義注疏之以經注爲主，而以疏附之。既不用經注之卷數，又不用正義之卷數。春秋爲六十卷，禮記爲六十三卷，遂使唐人正義之卷次不可知。蓋古今之遷變如此。禮記七十卷之本，出於吳中吳泰來家。乾隆間，惠棟用以校汲古閣本，識之云：「譌字四千七百有四，脫字一千一百四十有五，闕文二千二百一十有七，文字異者二千六百二十有五，義文九百七十有一點。」勘是正。四百年來闕誤之書，犁然備具，爲之稱快。今記中所云惠棟校宋本者是也。其真本今藏曲阜孔氏。近年有巧僞之書，賈取六十三卷舊刻，添注塗改，綴以惠棟跋語，鬻於人。鏤板京師者，乃贗本耳。今屬臨海生員洪震煊，以惠棟本爲主，並合臣舊校本及新得各本考其異同。臣復定其是非，爲校勘記六十有三卷。釋文則別爲四卷，後之爲小戴學者，庶幾有取於是。

春秋左氏傳漢初未審獻於何時。漢藝文志說孔壁事，祇云得古文尙書及禮記論語孝經，不言左氏經傳也。景十三王傳亦但云得古文經傳，所謂傳者卽禮之記及論語，亦未言有左氏也。楚元王傳劉歆讓太常博士亦以逸禮三十有九書十六篇系之魯恭王所得。孔安國所獻而於春秋左氏所修二十餘通則但云藏於祕府，不言獻自何人。惟說文解字序分別言之曰：「魯恭王壞孔子宅，得禮記尙書春秋論語孝經。」又北平侯張倉獻春秋左氏傳。然後左氏經傳所自出，始大白於世。顧許言恭王所得有春秋，豈孔

壁中有春秋經文爲孔子手定者與北平侯所獻蓋必有經有傳度其經必與孔壁經大同然則班志所云古經十二篇者指恭王所得與抑指北平所獻與左氏傳之學興於賈逵服虔董遇鄭衆穎容諸家杜預因之分經比傳爲之集解今諸家全書不可見而流傳間見者往往與杜本乖異古有吳皇象所書本宋臧榮緒梁岑之敬所校本今皆不可得蓋傳文異同可考者亦僅矣唐人專宗杜注惟蜀石經兼刻經傳杜注文而蜀石盡亡世間搨本僅存數百字後唐詔儒臣田敏等校九經鏤本於國子監此亦經傳注兼刻者而今多不存至於孔穎達等依經傳杜注爲正義三十六卷本自單行宋淳化元年有刻本至慶元間吳興沈中寶分系諸經注本合刻之其跋云踵給事中汪公之後取國子監春秋經傳集解正義精校萃爲一書蓋田敏等所鏤淳化元年所頒皆最爲善本而畢集於是後此附以釋文之本未有能及此者元和陳樹華卽以此本徧考諸書凡與左氏傳經文有異同可備參考者撰成春秋內傳考證一書考證所載之同異雖與正義本迥然不同然亦間有可采者臣更病今日各本之踏駁思爲胝正錢塘監生嚴杰熟於經疏因授以舊日手校本又慶元間所刻之本并陳樹華考證及唐石經以下各本及釋文各本精詳摺摭其爲校勘記四十二卷雖班孟堅所謂多古字古言許叔重所謂述春秋傳用古文者年代繇邈不可究悉亦庶幾網羅放佚冀成注疏善本用裨學者矣

漢武帝好公羊治其學者胡毋子都董膠西爲最著膠西下帷講誦著書十餘萬言皆明經術之意至於

今傳焉。子都爲景帝時博士。後年老歸教於齊。齊之言春秋者莫不宗事之。公羊之著竹帛。自子都始。戴宏序稱。子夏傳與公羊高。高傳其子平。平傳其子地。地傳其子敢。敢傳其子壽。壽與弟子胡毋子都著於竹帛。是也。何休爲膠西四傳弟子。本子都條例以作注。著公羊墨守。公羊文證例。公羊傳條例。尤遂於陰陽五行之學。多以讖緯釋傳。惟黜周王魯傳無明文。晉王接以爲乖礙大體。非過毀也。公羊傳文初不與經相連綴。漢志各自爲卷。孔穎達詩正義云。漢世爲傳訓者皆與經別行。故蔡邕石經。公羊殘碑。無經解。詁亦但釋傳也。分經附傳。大氏漢後人爲之。而唐開成始取而刻石。徐彥疏唐志不載崇文總目始著錄。亦無撰人名氏。宋董道云。世傳徐彥所作。其時代里居不可得而詳矣。光祿寺卿王鳴盛云。卽北史之徐遵明。不爲無見也。蓋其文章似六朝人。不似唐人所爲者。郡齋讀書志書錄解題並作三十卷。世所傳本乃止二十八卷。其參差之由亦無可考也。臣舊有校本。今更以何煌所校蜀大字本。宋鄂州官本。及唐石經本。宋元以來各注疏本。屬武進監生臧庸臚其同異之字。臣爲訂其是非。成公羊注疏校勘記十一卷。釋文校勘記一卷。後之爲是學者俾得有所考焉。

六藝論云。穀梁善于經。豈以其親炙於子夏所傳爲得其實與。公羊同師子夏。而鄭氏起廢疾。則以穀梁爲近孔子。公羊爲六國時人。又云傳有先後。然則穀梁實先於公羊矣。今觀其書。非出一人之手。如隱五年桓六年。並引尸子說者。謂卽尸佼。佼爲秦相商鞅客。鞅被刑後。遂亡逃入蜀。而預爲徵引。必無是事。或

傳中所言者，非尸倣也。自漢宣帝善穀梁，於是千秋之學起。劉向之義存，若更始唐固、麋信、孔衍、徐乾皆治其學，而范甯以未有善釋，遂沈思積年，著爲集解。晉書范傳云：徐邈復爲之注，世亦稱之。似徐在范後，而書中乃引邈注一十有七，可知邈成書於前，范甯得以摺拾也。讀釋文所列經解傳述人，亦可得其後先矣。漢志經傳各自爲秩，今所傳本未審合并於何時也。集解則經傳並釋，豈卽范氏之所合與？范注援漢魏晉各家之說甚詳，唐楊士勛疏分肌擘理，爲穀梁學者未有能過之者也。但晉豕魯魚，紛綸錯出，學者患焉。康熙間，長洲何煌者，焯之弟，其所據宋槧經注殘本，宋單疏殘本，並希世之珍。雖殘編斷簡，亦足寶貴。臣曾校錄，今更屬元和生員李銳合唐石經元版注疏本，及閩本監本毛本，以校宋十行本之譌。臣復定其是非，成穀梁注疏校勘記十二卷，釋文校勘記一卷。

春秋易大傳，聖人自作之文也。論語門弟子所以記載聖言之文也。凡記言之書，未有不宗之者也。魯齊古本異同，今不可詳。今所習者，則何晏本也。臣元於論語注疏，舊有校本，且有箋識，又屬仁和生員孫同元推而廣之，於經注疏釋文皆據善本，讎其同異，暇輒親訂成書，以詒學者云爾。

孝經有古文，有今文，有鄭注，有孔注，孔注今不傳。近出於日本國者，誕妄不可據要之孔注，卽存，不過如尙書之僞傳，決非真也。鄭注之僞，唐劉知幾辨之甚詳，而其書久不存。近日本國又撰一本，流入中國，此僞中之僞，尤不可據者。孝經注之列於學宮者，係唐元宗御注。唐以前諸儒之說，因藉摭摭以僅存，而當

時元行冲義疏經宋邢昺刪改亦尚未失其真學者舍是固無繇闕孝經之門徑也惟其譌字實繁臣元舊有校本因更屬錢塘監生嚴杰旁披各本竝文苑英華唐會要諸書或讎或校務求其是臣復親酌定之爲孝經校勘記三卷釋文校勘記一卷

爾雅一書舊時學者苦其難讀今則三家郵書塾匙不讀者文教之盛可云至矣爾雅注郭氏後出不必精審而從前古注之散見者通儒多愛惜擗拾之若近日寶應劉玉麈武進臧庸皆采輯成書可讀邢昺作疏在唐以後不得不粹唐人語爲之近者翰林學士邵晉涵改弦更張別爲一疏與邢並行時出其上顧邢書列學官已久士所共習而經注疏三者皆譌舛日多俗間多用汲古閣本近年蘇州翻版尤劣臣元搜訪舊本於唐石經外得明吳元恭仿宋刻爾雅經注三卷元槧雪窗書院爾雅經注三卷宋槧爾雅邢疏未附合經注者十卷皆極可貴授武進監生臧庸取以正俗本之失條其異同纖悉畢備臣復定其是非爲爾雅注疏校勘記六卷上中下三卷各分上下卷後之讀是經者於此不無津梁之益陸德明經典釋文此經爲

最詳仍別爲校訂譌字不依注疏本與經注相淆若夫爾雅經文之字有不與經典合者轉寫多岐之故也有不與說文解字合者說文於形得義皆本字本義爾雅釋經則假借特多其用本字本義少也此必治經者深思而得其意固非校勘之餘所能盡載矣

漢人孟子注存於今者惟趙岐一家趙岐之學以較馬鄭許服諸儒稍爲固陋然屬書離辭指事類情於

詰訓無所戾。七篇之微言大義，藉是可推。且章別爲指，令學者可分章尋求。於漢傳注別開一例，功亦勤矣。唐之張鑑、丁公著，始爲之音。宋孫奭采二家之善，補其闕遺，成音義二卷。本未嘗作正義也。未詳何人擬他經爲正義十四卷，於注義多所未解，而妄說之處，全鈔孫奭音義，略加數語，署曰孫奭疏。朱子所云邵武一士人爲之者是也。又盡刪章指矣。而疏內又往往詮釋其所削於十三卷，自稱其例曰：「凡於趙注有所要者，雖於文段不錄，然於事未嘗敢弃之而不明，其可議有如此者。」自明以來，學官所貯注疏本而已疏之悠繆不待言，而經注之譌舛闕逸，莫能譚正。吳中舊有北宋蜀大字本，宋劉氏丹桂堂巾箱本，相州岳氏本，盱郡重刊廖瑩中世綵堂本，皆經注善本也。賴吳寬、毛扆、何焯、朱奂、余肅客先後傳校，迄休寧戴震，授曲阜孔繼涵，安邱韓岱雲，鈐版。於是經注譌可正，闕可補，而注疏本有十行者，亦較它注疏本爲善。今屬元和生員李銳，合諸本臚其同異，臣爲辨其是非，以經注本正注疏本，以注疏本行，本正明之，閩本、北監本、汲古閣本，爲校勘記十四卷，章指及篇敘，既學者所罕見，則備載之。音義亦校訂附後，俾爲趙氏之學者，得有所參考折衷。日本孟子考文，所據僅足，利本古本二種，今則所據差廣。考孟子者殆莫能舍是矣。

福謹案是書及序，皆呈進蒙收覽，尙有進呈摺子見二集。

